

লতে লতে
করম গিত



সঁজু এতা
সমভূনাথ বঁসরিআর
সকতিপদত বঁসরিআর
আর
সসাঁগকত সেখর মাহাত

ପଃ ବଃ କୁଡ଼ମାଳି ଏକାଡେମିକ ନିଧରାନ

ଲତେ ଲତେ କରମ ଗିତ

ସଞ୍ଜୁଏତା

ସମଭୁ ନାଥ ବଂସରିଆର

ସକତି ପଦଅ ବଂସରିଆର

ଆର

ସର୍ଗାଂଗକଅ ସେଧର ମାହାତ

LATE LATE KARAM GIT

(A Traditional Karam Git Collection)

পহিল নিখরানঃ ১৬-০৯-২০১৩, করম আখড়া, হেঁটজাড়ি

'West Bengal Kurmali Academy' Publication

Working Office: At+P.O. - Begunkodar

Dist. - Purulia, Pin. 723214

হকদারঃ পঃ বঃ কুড়মালি একাডেমি

এস. সি. রউড, ডাকঃ সিঁদরি চাসরউড,

পুরুইলা ৭২৩১০৩

দামঃ ঠউকা ~~১০০~~ টাকা (১০০ টাকা)

পঁথি পাউএক ঠেকানঃ

- ১) সারদা প্রিন্টিং ওয়ার্কস, বেগুনকুদর (মঃ ৯৫৬৪৬১৮৮৯৮)
- ২) সসাঁগকঅ সেখর মাহাত, গাড়াফুসডঅ (মঃ ৯০০২৩৯৬৩৯৩)
- ৩) কুড়মালি ভাখি-চারি আখড়া, হেঁটজাড়ি (মঃ ৯৯৩২৫৮৭৯৪০)
- ৪) সক্তি পদঅ বঁসরিআর, চিটিডি (মঃ ৯৫৬৪৮০২৮৮৩)

ওয়েষ্ট বেঙ্গল কুড়মালি একাডেমিক পহিল সঁজুএতা

কুড়মালি ভাখিচারি বিদ

পদদঅ লচন মাহাত'ক

সেঁউরনে

খজ অড়

- ১) কাসি ফুল ফুটলা ৮ ২) একরি বিনু বৈখরি ৮ ৩) মাঞএক কবিঞ জনমল ভাই বহিন ৮
 ৪) পঁগপা রে পঁগপা জবুনা ৯ ৫) ভুঁগরিকা ধারিঞ ধারিঞ ৯ ৬) ইতি উতি জাউআ ১০
 ৭) কাসিঅ ফুটলি ১০ ৮) ভাইআ মর আলই গেলহরে ১১ ৯) সিপতল ভাই বিপতল বহিন ১১
 ১০) বারঅ বছরঅ সাসু তহর ঘারে ১২ ১১) আম পাত চিরি চিরি ১২ ১২) দুই মিলি গেলে দেউরা ১৩
 ১৩) ছুটুয়ুটু ধুরূপ গাছ ১৩ ১৪) কনঅ আমা হেরিহর ১৪ ১৫) কিআ ভারে নেউজএ ১৫
 ১৬) সন্তে সঁগি আই গেল একা সঁগি নেহি ১৫ ১৭) কানা মানা সাগ বাবা ১৬
 ১৮) দাদারে বইসলে নগরিআ ১৬ ১৯) বাপে মকে বিহা দেল ১৭ ২০) কনেহি ছলইএ কুঁড়টি কপাট ১৭
 ২১) বাঁধেকা গিটিআঞ ১৮ ২২) চালা নঅ লঅ সঁগতিরা ১৯ ২৩) উপর কুসহিঞ উতরল ১৯
 ২৪) আড় পড়সি ২০ ২৫) ঝিরি হিরি ২০ ২৬) নদিআ কিনারে মুগিআ ২০
 ২৭) কাঁহাঞি গরজএ বাঘাবাঘিন ২১ ২৮) কাঁহাকা রাজাঞ সড়প বেনাই ২২
 ২৯) সর সর বালিকের ২২ ৩০) কাঁহাঞি লহরএ ২২ ৩১) কনঅ পরবে ভাইরে ২৩
 ৩২) বাঁকারে বাঁকা কুরখি ২৩ ৩৩) হাখে লেলা টেঁগাঠনি ২৩ ৩৪) কিআ বিনু গে ধনি ২৪
 ৩৫) কনঅ ডহরে মইসি ২৪ ৩৬) ঝিলঅ না খেতে দেউরা ২৫ ৩৭) কাকর খেতে ডাঁগ ২৫
 ৩৮) ছাড়া লেহ ডাঁড়ি লেহ ২৬ ৩৯) আইজ তঅ রে করম রাজা ২৭
 ৪০) কনঅ পরবে দাদা ২৭ ৪১) কনঅ ধনি চরে গেলা ২৭ ৪২) কনঅ ধনি উঠইএ ২৮
 ৪৩) কাকর লাইএ রে দাদা ২৮ ৪৪) কিনি দে গউ বাপু ২৮ ৪৫) কনে তকে গাইর দেলউ ২৯
 ৪৬) কনে দেলা আইড় পাইড় ২৯ ৪৭) ছুটুয়ুটু আখড়া ৩০ ৪৮) নানহঅ নানহঅ বেতিকের ৩০ ৪৯)
 কাকরঅ আঁগনাঞ গাছ দারুন ৩০ ৫০) কাকরঅ হাখে ৩১ ৫১) কনঅ বনে জাহেইর বাঁটি ৩১ ৫২)
 কাকরঅ গাখে লালমাটি ৩২ ৫৩) বাপে মরঅ বিহা দেল ৩২ ৫৪) কনঅ নদি বহইএ ৩২
 ৫৫) পড়অলঅ ভাদরমাস ৩৩ ৫৬) সালদহা রূপাই নদি ৩৩ ৫৭) ভুঁগরিকা ধারে ধারে নজঅগলঅ ৩৩
 ৫৮) মেঘঅ আঁধারি রাতি ৩৪ ৫৯) কনে দেলা করম সাড়ি ৩৪ ৬০) বাগমুড়িক পাহাড়ে ৩৪
 ৬১) মুরগাহি বাঁগ দেলা ৩৫ ৬২) মালিনি গে কাঁহা বাজঅএ ৩৫ ৬৩) বড়ি মনে আউঅলি ৩৫
 ৬৪) ছটঅ মটঅ টকঅরা ৩৬ ৬৫) ছুটুয়ুটু কাড়উআ মালাদহে ৩৬ ৬৬) বিহা জে দেলে দাদা ৩৬
 ৬৭) আঁকা বাঁকা রে ৩৭ ৬৮) মাছেক নেতে দেখঅলঅ ৩৭ ৬৯) কাকর লাগি ডাইল ভাত ৩৭
 ৭০) বড়অ নদিক হদহদি ৩৭ ৭১) নদি পারে বিহা দেইল ৩৮ ৭২) সুখলঅ খেতে দেউরা ৩৮
 ৭৩) এক খাঁড়া পুঁঠি মাছ ৩৮ ৭৪) বরিসাঞ রপল ধান ৩৮ ৭৫) কাঁহাঞি উপজলঅ ৩৯
 ৭৬) কাকর ডরে রে হাঁখি ৩৯ ৭৭) পহিলঅ ভাদরে গেলঅ নইহরে ৩৯ ৭৮) বান আইলেক ৪০
 ৭৯) পুরুব দেসে নাভইএ ৪০ ৮০) দুখা জে দুহঅলি ৪০ ৮১) জাউআ তরে জনম লেলা ৪১
 ৮২) ভুঁগরিকা ধারে ধারে বুনলঅ ৪১ ৮৩) কনঅ টুঁগরিকে ৪১ ৮৪) ভুঁগরিকে ধান্নে ধারে বারনা ৪২
 ৮৫) গরি সাঁউঅরি দিঅ ৪২ ৮৬) কাঁহাঞি নাভইএ ৪২ ৮৭) কনে কড়াউলা ৪৩
 ৮৮) কতেক পানিঞ হেলঅলে ৪৩ ৮৯) কেরিআ পাইড় লাল সাড়ি ৪৩ ৯০) জাউআ ডালি ৪৪

জাখরাক ঠিনলে গিত গিলা পাউলিঅ :

সেবতি মাহাতঅ (লাতাড়), বানেসসর মাহাতঅ (বিসরিআ),
 অননতঅ কেসরিআর (তুলিন, বাঁগলাটাইড়),
 নগেন পুনরিআর (টিমঁগদা), সুসিলা মাহাত (হেঁটজাড়ি),
 রবিনদরঅ নাথ মাহাত (হেঁটজাড়ি), সাইমনি মাহাত (হাঁসলতা),
 নিলিমা মাহাত (হেঁটজাড়ি), আরতি মাহাত (হেঁটজাড়ি),
 নিঅতি মাহাত (চিটিডি), মুকুলা মাহাত (উপরবাটরি),
 বিরজঅ রাজ মাহাত, আননদঅ খুঁটদার (জারগঅ), সুধির মাহাত
 (লঁগকা), রবিনদরঅ নাথ মাহাত (উপরবাটরি)।

- ৯১) জেহু না বনে ভাইরে ৪৪ ৯২) একজ গাছে পাঁচজ ফর ৪৪ ৯৩) বাপে মকে বিহা দেল ৪৫
 ৯৪) কিআ লাগি গরজইএ ৪৫ ৯৫) বাড়ি হেঁটে রেল চলে ৪৫ ৯৬) পুরুবে পছিয়ে ৪৫
 ৯৭) টুগরিকা খারিআঞ ৪৬ ৯৮) কাঁহা উঠলে পরজু ৪৬ ৯৯) কনজ বিরখা তরে ৪৬
 ১০০) কারি ন গরি ৪৭ ১০১) কনে মরঅ ছলইএ ৪৭ ১০২) হেরিহর পবরে ৪৮
 ১০৩) খিলজ খেতে বুনল ৪৮ ১০৪) কনজ বনে গেলে সুগা ৪৮ ১০৫) বড় দাদাক দুআইরে ৪৮
 ১০৬) টুগরিকা ধারে ধারে বুনল ৪৯ ১০৭) কনে মরঅ রপইএ ৪৯ ১০৮) কন বরনে রাজি ৪৯
 ১০৯) কনে মরঅ জতইএ ৫০ ১১০) আজুকা রাহিত ভাই ৫০ ১১১) আনগা বাচেইতে সাসু ৫১
 ১১২) বারজ বছর বাদে ৫২ ১১৩) কাঁহা পাউঅলে ভাইআ ৫২ ১১৪) আমা ভরে সুতঅলে দাদা ৫৩
 ১১৫) কনজ পরব মানইএ ৫৩ ১১৬) সসুর কানা ভেসুর কানা ৫৩ ১১৭) কাঁহাই ফুটইএ হরদি ৫৪
 ১১৮) কেথিকেরি দিআ বাপু ৫৪ ১১৯) হিরি হিরি রে মছল ৫৪ ১২০) বনজ মাহান পাকলঅ ৫৫
 ১২১) তুলসি লাগাইএ পরজু ৫৫ ১২২) কনজ ধনি চরে গেল ৫৫ ১২৩) জাউআ উঠাউল মাঞ ৫৬
 ১২৪) কুঁদরি লতে বাঁথলে ৫৬ ১২৫) কনে মরঅ আনি দেতাক ৫৬
 ১২৬) নিরন মাসে জাইস না ৫৬ ১২৭) এক মুঠা চেনগি ৫৭
 ১২৮) দেসজ বুলি আউলে পরজু ৫৮ ১২৯) গেলা পহরঅ রাতি ৫৯
 ১৩০) কাকর মুড়ে সজইএ ৬০ ১৩১) কনে তকে করম রাজা ৬০



ছেউনি

সুঘড় হড় সমাজেক উচরনেক পহিল খেপ হেলেক চাসবাসেক উচরন।
 আর চাসবাসেক উচরনেক পহিল খেপ হেলেক বিহন আঁকরান।
 কাহে নঅ বিহনলে আঁকুর না বাহরালে চাসবাস হেতেক নিহি। মেনেক
 পরকিত্তিক আপন খেইআলে গাছলে ফর-দানা-বিহন গিরিকে আঁকুর
 বাহরাই ডাগর গাছেক নিঅর গাছ হেউএইতকে বেটিছউআরা গমলা
 আর অরা নিজেই গাছেক ফর-আঁঠি-বিহন-দানা গিলিন বাঁসেক ডালাঞ
 রাখিকে আঁকুর করে পারলা - হেলেক জাউআক সিরজন। তখন অরা
 বুঝে পারলা পরকিত্তিক লে ফর দানা লড়ি বিছি পেট ভরাউএ হেতেক
 নিহি। পেট ভরাউএক ডহর নিজেই ঠানি বাহরাউলা। তখন রিবে
 মন উদকি উঠলেন। আর মনেক রিঝ ফুটি বাহরালেন মুহে- গিতে
 গিতে, দেহিক রিঝ ফুটি বাহরালেক ডেগে ডেগে নাচে। উচরলেক
 করম পরব। গিত আর নাচ চলি আউএহেক এরিআক পেরিআঞ,
 মুহে মুহে লতে লতে।

এহে লতে লতে চলি আউঅল গিত গিলিনকে সঁজড়িকে এহে
 'লতে লতে করম গিত' পঁথিক নিখরান।

সঁজুএতা

১)

কাঁসি ফুলা ফুটলা আসা মনে জাগলা
এ গউ কবে আউঅতা, কবে আউঅতা ভইআ মর।
কাঁসি ফুলা ঝড়লা আসা তঅ মিটঅলা
এ গউ নেহি আউঅলা, নেহি আউঅলা ভইআ মর।।

২)

এঁকরি বিনু খেঁখরি
খিরউআ বাড়িক ফুল গঅ
লেইএ জাহ্, বেটি সএগা সসুর ঘার গঅ।
লেইএ জাহ্।
তঁহি জে জাবে বেটি
সএগা সসুর ঘার গঅ
পিঁধি লিহা
বেটি অএগরি পএগরি গঅ
পিঁধি লিহা।

৩)

মাএগক কখিএ জনমল ভাই বহিন গউ,
ইঁকরি খাউঅল মাএগক দুধ।
তহরি জনম ভাইরে রাজা দরবার গউ
হামরি জনম পরেক ঘার।
কনেহিঁ লিখল রাজা দরবার গউ
কনে লিখল পরেক ঘার।
সমাজে লিখল রাজা দরবার গউ
বিধিএ লিখল পরেক ঘার।

৪)

গঁগগা রে গঁগগা জবুনা
পিআ গেলা কসলা বনিজ।
কসলা বনিজেঁ পিআ লইট আইল
কিআ কিআ আনঅলে সনদেস।
দসঅ আঁগুরে দসঅ অঁগুরি
হাঁথেক জখঁে সাঁখউআ সনদেস।
গঁগগা রে গঁগগা জবুনা
পিআ গেলা কসলা বনিজ।
কসলা বনিজেঁ পিআ লইট আইল
কিআ কিআ আনঅলে সনদেস।
দুনঅ পঁএগরে দুনঅ পঁএগরি
ধনিক জখঁে বিছিআ সনদেস।

৫)

ডুঁগরিকা ধারিএ ধারিএ
দেউরাএ হারা জতইএ, দেউরাএ হারা জতইএ
অগঅ হামে সাসু, হামে সাসু দেউরাকে লহর।
তঁহি জে জাবে বহ
দেউরাকে লহর, কি দেউরাকে লহর,
অগঅ - পিঁধি লিহা, পিঁধি লিহা অএগরি পএগর।
অঁএগরি পএগরি সাসু
ঝলকলে গেলউ, কি ঝলকলে গেলউ
অগঅ সইখিন মরঅ, সইখিন মরঅ ডাহেঁ মরি জাই।
কিআ গঅ সইখিন
ডাহেঁ মরি জাইহা, কি ডাহেঁ মরি জাইহা
অগঅ তহর ইরাএ, তহর ইরাএ আরঅ পহিরম।

৬)

ইতি উতি জাউআ কিআ কিআ জাউআ
জাউল মঞ জাউল মঞ দানা বহলা ।
সেহরে জাউআ এক পাঁতা সইরে
রাড়া হরিলা চরি চরি জাই রে ।
হেরিনি মারঅবঁ সুঅরি জিআউবঁ
সরগহইলা দহঁ পনিআ গিআউবঁ ।
সরঅ হটি ঘইলা কজরতি পনিআ
গঁগগা বহি গেইলা বিরি হিরি পনিআ ।
গঁগগা রে গঁগউআর তরে নঅ মরে
দুরিআ দে ভইআ পাহাড়অ ফাড়ে ।
পাহাড়হি আহঅ সাটি মুনিস রে
সাটি মুনিসেকর সই বহু কানি ।
সই বহু রানি এক বহু কানি
কানিকে দেবেঞ মঞ ঘইলা ভরি পানি ।
ঘইলা লে উইঠ গেল গহমনঅ সাঁপ রে ।
ছাড় ছাড় গহমনঅ এহঅ ডাঁড়ি ঘাট রে ।
বাটঅ ছাড়িএ কিআ ফুল পাউলে রে
পাউঅলঁ ভাইরে করমঅ গসাই রে ।
দেহু করম রাজা দেহু আসিস রে
ভইআ মরঅ বাঢ়তঅ লাখঅ বরিস রে ।
দেবঁ জে করমতি দেবঁ আসিস রে
ভইআ তরঅ বাঢ়তঅ লাখঅ বরিস রে ।
অড়সি রে পড়সি নানি নানি সুতা
নানি নানি সুতাক ধতিআ বুনাউবঁ ।
ধতিআ চিরি চিরি বতিআ বনাউবঁ
সেহঅ বাতি জরেই করমেকা রাইত রে ।

৭)

কাসিঅ ফুটঅলি
আসঅ লাগলি গউ
কবে জে আউঅত ভইআ মর ।
তড়ি না দিহা ননদসু ভাই
পহিরত ননঅদি হামর ।

লতে লতে করম গিত ১০

৮)

ভইআ ঘার আলহঁ গেলহঁরে,
পাউঅল জাউআকেরি মইঠ রে । ২
সেহঅ জাউআ হেরাইতে বেরাইতে গেল রে ।
লাগলই চন্দনেক গহাইর রে । ২
মাচিআ বইঠলঅ তুঁহে, আম্মা বড়ে তিন গউ
দেহু আম্মা ঢালঅ তেরআল । ২
কিআ পুতা জাউঅবে সর সিকাররে,
কিআ পুতা রাজা দরবার । ২
নহি হামে জাউঅব সর সিকার গউ
নহি হামে রাজা দরবার । ২
একা হামে জাউঅব চনদন গহার গউ,
জাহি দেসঁ চনদন বহুত । ২
জা-একে জাইহা পুতা চনদন গহাররে,
পরঅ তিরিআ হাঁসি না বুলিহা । ২
পরঅ জে তিরিআ আম্মা মাই বহিন গউ,
আউরঅ সসুরা ঘারেক লক । ২

৯)

সিপতল ভাই বিপতল বহিনি,
বিপত বহিনিঞ মাঁগে বাস ।
জেহ জে বাসা পরভু ননদিকে দেবেঞ গঅ
সেহ জে বাসাঞ পরভু বাছুরি খহড়াই ।
মাথাঞ লেলা মটা বাটা, কাঁখে লেলা ছাতা গঅ,
কুনকি কুনকি বহিন গেলা সসুর ঘার ।
ঘুরেঁ কি ঘুরেঁ বহিন, আবুকেরি রাইত গঅ,
জনমল ঘারে বহিন, নেহি হেলঅ বাস ।

লতে লতে করম গিত ১১

১০)

বারঅ বছরঅ সাসু তহর ঘারে বিহা গউ
কবহঁ না দেখে বোটা তর।
হামরি জে বোটা বহু রাজা দরবার গউ
সাঁখে আউএই বিহান চলি জাই।
রাঁধু কি রাঁধু বহু ঘিঅ মুগা ডাইল গউ
লেইএ জাই খেতঅ না গঠ।
কইসে হামে চিনহবঅ সাসু খেতঅ না গঠ গউ
কইসে চিনহব বোটা তহর।
রাঁধিএ রাঁধিএ সাসু হেলা সমুদাই গউ
কইসে চিনহবঅ বোটা তহর।
হামরি জে বোটা বহু আগু হারে ঘুরএ গউ
হারে বাহে রেঁগিআ বরদ।
জাইএ ডাঁড়হালঁ সাসু তহর বোটাক পাস গউ
রনঅ রনঅ নজরি ঘুরাই।
কিআ হঅ পরভু নজরি ঘুরাইহা গউ
এহঅ বাটে নইহর চলি জাম।
কিআ খাইএ রহবে ধনি নইহরে তহর গউ
কিআ দেখি বাঁধবে দিল।
দহি দুধা খাইঅব হামরি নইহর গউ
সঁগি দেখি বাঁধঅবঁ দিল।

১১)

আম পাত চিরি চিরি লেখনা লেখব, কি লেখনা লেখব
অগঅ হামে বাপু, হামে বাপু কতি দিন কুঁঅর।
তরঅ জে বিহা বোটি সিঁসু উমইর, কি সিঁসু উমইর
অগঅ তরঅ তিরিআ, তরঅ তিরিআ মরি হেজাই গেল।
হামরি জে তিরিআ বাপু মরি হেজাই গেল কি মরি হেজাই গেল
অগঅ ছাইঅ বানি, ছাইঅ বানি দেহ দেখাই।
পুরুবোঁই উমড়ল পচছিমেহি বরিসল, কি পচছিমে বরিসলঅ
অগঅ ছাইঅ বানি, ছাইঅ বানি লেগলঅ ধউআই।

লতে লতে করম গিত ১২

১২)

দুই মিলি গেলে দেউরা একা ঘুরি আউলে হউ
কাঁহা রাখলে পিঠেক ভাই।
হামরি জে ভাই ভউজি বড়ি রিঝুআল হউ
বিজু বনে খেলতঅ ঝুমইর।
কেখিএ ভিজলঅ দেউরা হেরেদ রাঁগল ধতিআ হউ
কেখিএ ভিজলঅ তরুআল।
সিঁসিরে ভিজলঅ ভউজি হেরেদ রাঁগল ধতিআ হউ
রকতে ভিজলঅ তরুআল।
কাকে কাটঅলে দেউরা কাকে মারঅলে হউ
কাকে করঅলে সিঁসুরাঁড়।
ভাই কাটলঁ ভউজি ভাই মরঅ মারলঁ হউ
ভউজিকে করলঁ সিঁসুরাঁড়।
ভাই কাটঅলে দেউরা ভালঅ করলে হউ
ভউজি কেরি লেহ অঁগিভার/আপাভার।
হামে জে দেবঁ ভউজি লুগুআ তহর হউ
গতনি দেউঅত ডুভা ভরি মাড়।

১৩)

ছুটমুট ধুরুপ গাছ ফুলে লদঅবদ গউ
বেটিআ চললঅ সসুর ঘার
তঁহি জে জাবে বেটি সএগা সসুর ঘার গউ
খেলি লিহা করমেকা রাইত।
হামে কেইসে খেলবঅ করমেকা রাইত গউ
সসুর ঘারে ভেঁসুর বেজার।
ভেঁসুর মরলঁ বেটি দসর ভেঁসুর পাউবে গউ
নেহি পাউবে করমেকা রাইত।
সতে পরব বাপু বছর বছর ঘুরইএ গউ
নেহি ঘুরেই মরল মানুস।

লতে লতে করম গিত ১৩

১৪)

কনঅ আমা হেরিহর কনঅ আমা পিঅর (কনঅ আমা.....)
 অগঅ কনঅ আমা, কনঅ আমা সিদুরঅ বরন।
 সেহ আমা বিছে গেলা, কেনিআ কুঁঅর (কেনিআ কুঁঅর.....)
 অগঅ রাজা বেটাএঃ, রাজা বেটাএঃ ধরলঅ আঁচর।
 ছাড়ু ছাড়ু রাজা বেটা হামরি আঁচর (হামরি আঁচর.....)
 অগঅ হামে হেঁকঅ, হামে হেঁকঅ কেনিআ কুঁঅর।
 তঁহি জে হেকিস ভালা কেনিআ কুঁঅর (কেনিআ কুঁঅর.....)
 অগঅ হামে হেঁকঅ, হামে হেঁকঅ বরঅ কুঁঅর।
 তঁহি জে হেকিস ভালা বরঅ কুঁঅর (বরঅ কুঁঅর.....)
 অগঅ চলি জাঁই চলি জাঁই আজাকে বাখইর।
 কইসে হামে চিনহব আজাকে বাখইর (আজাকে বাখইর.....)
 অগঅ কইসে চিনহব কইসে চিনহব আজা তর।
 আজাকেরি দুআরাহি হাঁসারাজা ঘড়উআ (কি হাঁসারাজা ঘড়উআ.....)
 অগঅ বাখইলৈ তঅ ঘুরহ মেজুর।
 কেসন কেসন ঘুরএ হাঁসা রাজা ঘড়উআ (কি হাঁসারাজা ঘড়উআ.....)
 অগঅ কেসন কেসন, কেসন কেসন ঘুরহ মেজুর।
 কিআ কিআ খাউঅতঅ হাঁসা রাজা ঘড়উআ (কি হাঁসারাজা ঘড়উআ.....)
 অগঅ কিআ কিআ খাউঅতঅ মেজুর।
 ঘাঁসাপানি খাইঅতঅ হাঁসারাজা ঘড়উআ (কি হাঁসারাজা.....)
 অগঅ দানাপানি দানাপানি খাউঅতঅ মেজুর।

লতে লতে করম গিত ১৪

১৫)

কিআ ভারে নেউজএ গাছঅ না তরু গঅ
 কিআ ভারে নউএ ধেনু গাই।
 কিআ ভারে নউএ খাউআসিনি বেটিআ
 ডালা লেইএ ফুলা তড়ে জাই।
 ফুলা ভারে নেউজএ গাছঅ না তরু গঅ
 সাজঅ ভারে নউএ ধেনুগাই,
 আভরনে নউএ খাউআসিনি বেটিআ
 ডালা লেইএ ফুলা তড়ে জাই।
 কিআ বিনু দুবড়ল পচছিমেকা লকা গঅ
 কিআ বিনু দুবড়ল গাই।
 কিআ বিনু দুবড়ল রাজাকা বেটা গঅ
 চুনা লেঁখে মুহা লরুআই।
 অনঅ বিনু দুবড়ল পচছিমেকা লকা গঅ
 ঘাসা বিনু দুবড়ল গাই।
 পান বিনু দুবড়ল রাজাকা বেটা গঅ
 চুনা লেঁখে মুহা লরুআই।

১৬)

সভে সঁগি আই গেল একা সঁগি রহি গেল
 (একা সঁগি.....)
 অগঅ একা সঁগি
 একা সঁগি পড়ল বেজার।
 দলা ডাঁড়ি ছাঁদব তাউএ সঁগি আনব
 (তাউএ সঁগি.....)
 অগঅ মর দেসেঁ
 মর দেসেঁ আহে কবিরাজ।
 কবিরাজকে দেবেএঃ মএঃ সাত হাঁথেক খতিআ
 (কি সাত হাঁথেক.....)
 অগঅ দাইলৈ চারেঁ
 দাইলৈ চারেঁ করব বিদাই।

লতে লতে করম গিত ১৫

১৭)

কানা মানা সাগ বাবা
একেটা জাউআঞ গঅ
খাইএ খজেই জারা বিরহিক ডাইল (২)
হাঁমে নেহি খজঁ সাসু
জারা বিরহিক ডাইল গঅ
হাঁমে খজঁ বেটিআ বিদাই গঅ
হাঁমে খজঁ বেটিআ বিদাই।
তেলি ঘারৈ তেল বাবা
জভি খেতে ধান গঅ
সুধা হাঁখৈ কইসনঅ বিদাই গঅ
সুধা হাঁখৈ কইসনঅ বিদাই।
উঠে কেটি কুটে ধান
আরঅ কুটে গুঁড়ি গঅ
লিলজ জাউআঞ বেটি
নিহি জাতউ ঘুরি গঅ।

১৮)

দাদারে বইসলে নগরিআ
দিহা দাদা লুগুআ সনদেস।
বহিনগে সভেরে সসতা ভেল,
একা তাঁতি বেজার পড়ি গেল।
দাদারে বইসলে নগরিআ
দিহা দাদা ডালউআ সনদেস।
বহিনগে, সভেরে সসতা ভেল
একা ডমা বেজার পড়ি গেল।

১৯)

বার্পে মকে বিহা দেল সমুনদর উপার
(কি সমুনদর.....)
অগঅ সমুনদর ভরল,
সমুনদর ভরল ছউঅ মাস।
বাপকে মর কহি দিহা দিনা চারি লেগতা
(কি দিনা চারি.....)
অগঅ পরবঅ তিহার
পরব তিহার সাসেকে অধিন।
সাসে মকে দেলহ গটা চারি পিঠা
(কি গটা চারি পিঠা)
অগঅ ননদ রে হামর
ননদ রে হামর থুমুসা ফুলাই।
কিআ গঅ ননদি থুমুসা ফুলাই
(কি থুমুসা.....)
অগঅ তহর ইরাঞ
তহর ইরাঞ নইহর চলি জাম।

২০)

কনেহি ছলইএ কুঁড়চি কপাট
(কুঁড়চি কপাট)
অগঅ কনে ছলইএ
কনে তঅ ছলইরে জাহাজ।
সঞাঞ মর ছলইএ কুঁড়চি কপাট
(কুঁড়চি কপাট)
অগঅ ভাইএ মরঅ
ভাইএ মরঅ ছলইরে জাহাজ।

২১)

বাঁধেকা পিঁড়িআঞ কনে আউএ তিনিআ
(কনে আউএ.....)
অগঅ চিনহু ভউজি
চিনহু ভউজি কনঅ দেসেক লক।
আঙঞ ননদসুআ পেছুঞ ননদসুআ
(পেছুঞ.....)
অগঅ মইধে আহউ
মইধে আহউ সহদর ভাই।
পানি দেহু পিঁটা দেহু সহদর ভাই
(সহদর ভাই.....)
অগঅ খাইএ লেহু
খাইএ লেহু দহি দুধা ভাত।
কইসে হামে খাউঅব দহি দুধা ভাত
(দহি দুধা ভাত)
অগঅ মাঞ মরল
মাঞ মরল তিনি মাস।
একা মাসা গেল ভাইরে দুঅ মাসা গেল
(দুঅ মাসা.....)
অগঅ তিনি মাসেঁ
তিনি মাসেঁ মাঞএকে বানার।
কনেঁ কাঁদত ভাইরে অহরেঁ পহর
(অহরেঁ পহর)
অগঅ কনেঁ কাঁদত
কনেঁ কাঁদত ছউঅ মাসা।
হামে কাঁদব ভাইরে অহরে পহর
(অহরেঁ পহর)
অগঅ ভউজি কাঁদত
ভউজি কাঁদত ছউঅ মাস।

২২)

চালা নঅ লঅ সঁগতিরা
জবুনাকে বারি
ধিরিধিরি।
হামরা ভরব গাগরি (ধিরিধিরি)।
ঘারে জে আহউ হামর আজি দুলারি
কতি ধুরেঁ
আহউ দিঅ পেনহরি,
কতি ধুরেঁ
চালা নঅ লঅ সঁগতিরা
জবুনাকে বারি
ধিরি ধিরি
হামরা ভরব গাগরি (ধিরি ধিরি.....)।
ঘারেঁ জে আহউ হামর
জেঠি দুলারি
কতি ধুরেঁ
আহউ দিঅ পেনহরি
কতি ধুরে।

২৩)

উপর কুলহিঞ উতরল মালিনি বেটিআ
(কি মালিনি.....)
অগঅ গাঁথে লাগল
গাঁথে লাগল ফুলেকেরি হাইর
অহে বাটে আউঅএ বড়কাঅ দাদা
(কি বড়কাঅ.....)
অগঅ পিঁধে লাগল
পিঁধে লাগল ফুলেকেরি হাইর।
সাঁকট গলিআ ঘড়উআ দউড়াউএ
(কি ঘড়উআ.....)
অগঅ খসি গেলা
খসি গেলা ফুলেকেরি হাইর।

২৪)

আড় পড়সিআ মাঞ বহিনিআ
(কি মাঞ বহিনিআ)
অগঅ বিছি দিহা
বিছি দিহা ফুলেকেরি হাইর।
হামে কইসে বিছব ফুলেকেরি হাইর
(কি ফুলেকেরি হাইর)
অগঅ ঘারে আহঅ
ঘারে আহঅ মাঞ বহিন।
মাঞ তর বুঢ়িআ বহিনি সসুরঘার
(কি বহিনি সসুর ঘার)
অগঅ ধনি তর
ধনি তর করম খেলে গেল।

২৫)

বিরিহিরি নদিআঞ সৈউআল বহেইরে
হা ভালা ভাঁহি বাগালিন বেটিঞ দাইল দড়রই রে।
এহ বাটে আউএ রাজাক বেটারে,
হা ভালা হাঁথ উলারি রাজাঞ দাইল মাগেই রে।
হামে কইসে দেউঅব রাজাক বেটারে,
হে ভালা, আজা কুল নাম ডুবি জাইতঅ রে।

২৬)

নদিআ কিনারে মুগিআ বুইন দেলা রে,
হে ভালা, কনঠিনে সাসু হেরাই গেলা রে।
ঘড়উআকা পিঠে সসুর দইড় গেলা রে,
হে ভালা, কনঠিনে সাস পাউআই গেলা রে।

লতে লতে করম গিত ২০

২৭)

কাঁহাঁঞি গরজএ বাঘাবাঘিন
(বাঘাবাঘিন)
অগঅ কাঁহা গরজে
কাঁহা গরজে ধেনু গাই।
কাঁহাঁঞি গরজএ রাজাকা বেটা
(কি রাজাকা)
অগঅ চুনা লেখেঁ,
চুনা লেখেঁ মুহ লরুআই।
গাঢ়াক ভিতর গরজএ বাঘাবাঘিন
(কি বাঘা বাঘিন)
অগঅ গঠে গরজে
গঠে গরজে ধেনুগাই।
বেড় ভিতর গরজএ রাজাকা বেটা
(কি রাজাকা....)
অগঅ চুনা লেখেঁ
চুনা লেখেঁ মুহা লরুআই।
কিআ লাইএ গরজএ বাঘা বাঘিন
(কি বাঘা বাঘিন)
অগঅ কিআ লাএ
কিআ লাইএ গরজে ধেনুগাই।
আহার লাইএ গরজএ বাঘাবাঘিন,
(কি বাঘা বাঘিন.....)
অগঅ বাছুর লাইএ
বাছুর লাইএ গরজএ ধেনু গাই।
কিআ লাইএ গরজে রাজাকা বেটা
(কি রাজাকা)
অগঅ চুনা লেখেঁ
চুনা লেখেঁ মুহা লরুআই।
খাজনা লাইএ গরজএ রাজাকা বেটা
(কি রাজাকা)
অগঅ চুনা লেখেঁ
চুনা লেখেঁ মুহা লরুআই।

লতে লতে করম গিত ২১

২৮)

কাঁহাকা রাজাএঃ সড়প বেনাই গউ
কাঁহাকা রাজাএঃ করহ লড়াই।
জইপুৱেক রাজাএঃ সড়প বেনাই গউ
ঝেইলদাক রাজাএঃ করহ লড়াই।
কিআ লাগি রাজাএঃ সড়প বেনাই গউ
কিআ লাগি করহ লড়াই।
নাম লাগি রাজাএঃ সড়প বেনাই গউ
নাম ডুবি করহ লড়াই।

২৯)

সরু সরু বালিকের জাউআ উঠাইহা গঅ
হিঁদে গেলে হিঁদে ডহি জাই (২) গঅ।
নাচহিতে খেলহিতে দেখি না পসাই গঅ
তাকর আঁখিএঃ ভেলুআ তেল গঅ।

৩০)

কাঁহাঞি লহরএ লহর লহর বাঁস গঅ
আর কাঁহাঞি বুরুআউএই বহিনি হামর।
বাঁসঝুঁড়ে লহরএ লহর লহর বাঁস গঅ
সসুর ঘারে বুরুআউএই বহিনি হামর।
কেথিএঃ কাটি আনঅবঅ লহর লহর বাঁস গঅ
কেথিএঃ করি আনঅবঅ বহিনি হামর।
কুটাইরে কাটি আনঅবঅ লহর লহর বাঁস গউ
দলার্ডাউএঃ আনঅবঅ বহিনি হামর।
কাঁহা আনি রাখব লহর লহর বাঁস গঅ
কাঁহা আনি রাখঅবঅ বহিনি হামর।
ছাঁছাএঃ গঁজি রাখবঅ লহর লহর বাঁস গঅ
মইধঅ খাঁধাএঃ রাখব রহিনি হামর।
কিআ কিআ খাউঅতঅ লহর লহর বাঁস গঅ
কিআ কিআ খাউঅতঅ বহিনি হামর।
ছাঁহাক পানি খাউঅতঅ লহর লহর বাঁস গঅ
দুধা ভাতা খাউঅতঅ বহিনি হামর।
কিআ লাইএ আনঅবঅ লহর লহর বাঁস গঅ
কিআ লাইএ আনঅবঅ বহিনি হামর।
ডালা টুপা করে আনঅবঅ লহর লহর বাঁস গঅ
করম খেলে আনঅবঅ বহিনি হামর।

লতে লতে করম গিত ২২

৩১)

কনঅ পরবে ভাইরে, আনলে লেগলে রে
কনঅ পরবে ভাইরে, করলে বিদাই।
করম পরবে ভাইরে, আনলে লেগলে রে
জিতিআ পরবে ভাইরে, করলে বিদাই।
কাকর জনম ভাইরে, রাজ দরবার রে
কাকর জনম ভাইরে, সঞা সসুর ঘার
তহরি জনম ভাইরে, রাজ দরবার রে
হামরি জনম ভাইরে, সঞা সসুর ঘার।

৩২)

বাঁকারে বাঁকা কুরথি
ভুজে বইসল ছটকি ননদ।
ভুজইতে ভুজইতে ননদ পড়ি হেল
লাজহু না গেলা সসুর ঘার।
এহ লাজ রাখবে গে ননদি
আনে জাবউ পহিলঅ ভাদর।

৩৩)

হাঁথে লেলা ঠেঁগাঠনি গড়ে লেলা খড়ম গঅ
রুণুকি বুনুকি পরভু কুলহি বুলে গেল।
গেলা পহর রাতি আইলা ভিনসরা গঅ
কাঁহা জাইএ হঅ পরভু খেপলে রাইত।
আখড়াহি আহ ধনি দসঅ বিসঅ লক গঅ
তাঁহা জাইএ গে ধনি খেপল রাইত।
তহরি জে কথাএঃ পরভু হামে না পতিআব গঅ
ছুইএ লিহা হঅ পরভু তামবা তুলসি।
তামবা তুলসি ছুলে হামে মরি জাব গঅ
ছুটি জাইঅত গে ধনি সিঁথে কা সিঁদুর।
সিঁথেকা সিঁদুর ছুটলে হামে মরি জাব গঅ
তাউএ না সহব পরভু সইতিনেকা ঝাল।

লতে লতে করম গিত ২৩

৩৪)

কিআ বিনু গে ধনি রুগগ বিরুগগ
(কি রুগগ.....)
অগঅ কিআ বিনু
কিআ বিনু না বাঁধলে কেস
কিআ বিনু গে ধনি মুহা তরঅ মলিন
(কিআ মুহা তরঅ.....)
অগঅ কিআ বিনু দুনিআ আঁধার
অননঅ বিনু গে ধনি রুগগ বিরুগগ
(কি রুগগ)
অগঅ তেল বিনু
তেল বিনু না বাঁধলে কেস।
পান বিনু গে ধনি মুহা তরঅ মলিন
(কি মুহা)
অগঅ পুতা বিনু
পুতা বিনু দুনিআ আঁধার।

৩৫)

কনঅ ডহরৈ মইসি ডহরি গেলে গে
কনঅ জে রাখেঁ মইসি করলে চরাট।
কনঅ জে দহৈ মইসি পানিআ পিঅলে গে
কনঅ তরৈ মইসি ডহরি গেলে গে।
বিজুবন রাখেঁ মইসি করলে চরাট।
মালাদহৈ গে মইসি পানিআ পিঅলে গে
বড়া তরৈ গে মইসি করলে গঠইর।
মথুরা সহরৈ মইসি জুতি ফুটি গেল গে,
বিজুবন রাখেঁ মইসি আইগ লাগি গেল
মালাদহৈ গে মইসি বালি ভাখাই গেল গে
বড়াগাছ গে মইসি চরে কাটি লেল।
মথুরা সহরে মইসি সুরথি পিটাউঅব গে
বিজুবন রাখেঁ মইসি দুধা চারি দেব।
মালা দহৈ গে মইসি মদিঅ লাগাউঅব গে
বড়া গাছ গে মইসি ঘুরি লাগাউঅব।

লতে লতে করম গিত ২৪

৩৬)

খিলঅ না খেতে দেউরা বকলি না চরে
সেহঅ দেখি দেউরা চলঅলা বিদেসে, সেহঅ দেখি -
তঁহি জে জাবে দেউরা মালনচঅ দেসেঁ
আনি দিহা, দেউরা সাড়িআ সনদেসা, আনি দিহা -
হামরি জে দেসেঁ ভউজি সঁসিরা বহুতা
ভিজি জাইতঅ, ভউজি সাড়িআ সনদেসা, ভিজি জাইতঅ --
ভিজি দঁহি ভিজি দঁহি সাড়িআ সনদেসা
সুখাই লেব, সেতঅ পবন বাসাতেঁ, সুখাই লেব-।
হামরি জে দেসে দেউরা সুখল বরিসা
সুখাই লেব, সেতঅ পবন বাসাতেঁ, সুখাই লেব-।
তঁহি জে জাবে দেউরা মালনচঅ দেসেঁ
আনি দিহা, দেউরা সিঁদুরা সনদেসা, আনি দিহা-
হামরি জে দেসেঁ ভউজি সঁসিরা বহুতা
ভিজি জাইতঅ, ভউজি সিঁদুরা সনদেসা, ভিজি জাইতঅ
হামরি জে দেসেঁ দেউরা সুখল বরিসা
সুখাই লেবঅ সেতঅ পবন বাসাতেঁ, সুখাই লেব-।

৩৭)

কাকর খেতেঁ ডাঁগ গাড়াইএ গেল,
কাকর খেতেঁ উবজলঅ ধান।
সঞাক খেতেঁ ডাঁগ গাড়াইএ গেল,
ভইআক খেতে উবজলঅ ধান।
ভালারে বরিসা ভেল টান
রাজাঞ মাগে খাজনা,
পিআদাঞ মলেই কান
রে বরিসা ভেল টান (২)।

লতে লতে করম গিত ২৫

৩৮)

ছাতা লেহু ডাঁড়ি লেহু পুতা হামরা
জাহু পুতা, সে তঅ বহিনেক বানারা
জাহু পুতা-।
হামে কইসে জাব মাঞ গঅ বহিনেক বানারা
কুলহিক মুড়াঞ, সে তঅ ভরল জবুনা -
কুলহিক মুড়াঞ-।
একঅ ডাবকা দেল মাঞ গঅ দুই ডাবকা দেল
তিনি ডাবকাঞ, সে তঅ জবুনা সুখাই গেল-
তিনি ডাবকাঞ-।
ছাতা রাখু ডাঁড়ি রাখু ভাইঅ হামরা
কহু ভাই-ই, সে তঅ মাঞএক বানারা
কহু ভাই-ই।
কিআ কহবঅ বহিন মাঞএক বানারা
মাঞএক করাঞ, সে তঅ গউর বরন বেটা
মাঞএক করাঞ-।
ছাতা লেহু ডাঁড়ি লেহু ভাইঅ হামরা
জাহু ভাই-ই, সে তঅ আপনঅ দেসা
জাহু ভাই-ই।
হামে কইসে জাব বহিন আপনঅ দেসা
কুলহিক মুড়াঞ, সে তঅ ভরলঅ জবুনা
কুলহিক মুড়াঞ-।
একঅ ডাবকা দেল বহিন দুই ডাবকা দেল
তিনি ডাবকাঞ, সে তঅ সুখাল জবুনা,
তিনি ডাবকাঞ।
ছাতা রাখু ডাঁড়ি রাখু পুতা হামরা
কহু পুতা, সে তঅ বহিনেক বানারা
কহু পুতা-।
কিআ কহব মাঞ গঅ বহিনেক বানারা
বহিন দেসে, সে তঅ লুলহি মাছেক বারা
বহিন দেসে।

লতে লতে করম গিত ২৬

৩৯)

আইজ তঅ রে করম রাজা ঘারে দুআইরে
আর, কাইল রে করম রাজা কাঁস নদিক পারে।
জাহু জাহু করম রাজা জাহু ছইঅ মাস
আর, আউঅতঅ ভাদরঅ মাস আনঅবঅ ঘুরাই।
তএ তঅ রে করম রাজা জাবে নইহর
আর, মএ তঅ রে করম রাজা জাম সসুর ঘার।
তএ তঅ রে করম রাজা জাবে হাঁসি হাঁসি
আর, মএ তঅ রে করম রাজা জাম কাঁদি কাঁদি।
করম রাজা বেড়ে ভালঅ সারে ভারে আউএই
আর, গাঁউএক লক বেড়ে মদঅ তুরুতে ভাসাউএই।
সসুর ঘারলে আউল মএ চৈথঅরা গৈদঅরা
আর, করম রাজাঞ মাগাই দেলা লহঅরা পটঅরা।

৪০)

কনঅ পরবে দাদা আনঅলে লেগঅলে রে
কনঅ পরবে দাদা করলে বিদাই।
করম পরবে দাদা আনঅলে লেগঅলে রে
জিতিআ পরবে দাদা করঅলে বিদাই।
কিআ খাউআউলে দাদা কিআ পিঁধাউলে রে
কিআ দেইএ রে দাদা করঅলে বিদাই।
ভাতঅ খাউআউলে দাদা লুগা পিঁধাউলে রে
ডালা দেইএ রে দাদা করঅলে বিদাই।

৪১)

কনঅ ধনি চরে গেলা কাঁস নদি পার।
গাইআ ধনি চরে গেলা রনে বনে গঅ
মইসি ধনি চরে গেলা কাঁস নদি পার।
কনঅ ধনি ঘুরঅএ বেরা ডুবাঞ গঅ
কনঅ ধনি ঘুরঅএ চাঁদঅ উগাঞ।
গাইআ ধনি ঘুরঅএ বেরা ডুবাঞ গঅ
মইসি ধনি ঘুরঅএ চাঁদঅ উগাঞ।

লতে লতে করম গিত ২৭

৪২)

কনঅ ধনি উঠঅএ বড়কি ভিনসরা গঅ
কনঅ ধনি উঠঅই রে বিহান।
ভউজি ধনি উঠইএ বড়কি ভিনসরা গঅ
হামে ধনি উঠঅই রে বিহান।
কনঅ ধনিএঃ ধরঅএ ঝারি গাগরি গঅ
কনঅ ধনিএঃ ধরঅই রে বাড়হইন।
ভউজি ধনিএঃ ধরঅএ ঝারি গাগরি গঅ
হামে ধনি ধরঅএ বাড়হইন।
কেসন কেসন করঅএ ঝারি গাগরি গঅ
কেসন কেসন করঅএ বাড়হইন।
ঝিকিমিকি করঅএ ঝারি গাগরি গঅ
ছরঅ ছরঅ করঅএ বাড়হইন।

৪৩)

কাকর লাইএ রে দাদা আখঅড়া ছলঅলে
আর, কাকর লাইএ দাদা আনে নিহি গেলে।
হামর লাইএ রে দাদা আখঅড়া ছলঅলে
আর, ভউজিক লাইএ রে দাদা আনে নিহি গেলে।
সেহঅ আখড়াএঃ দাদা কনে নাচঅতউ রে
আর, সসুর ঘারে দাদা বহিনি কাঁদঅতউ।

৪৪)

কিনি দে গউ বাপু লালপেটি ডালউআ
ইঅ গউ হামে বাপু, হামে বাপু জাম সসুরঘার।
তঁহি জে জাবে বেটি তরঅ সসুর ঘার
ইঅ গউ খেলি লিহা, খেলি লিহা করমেকা রাইত।
কেইসে হামে খেলঅবঅ করমেকা রাইত
ইঅ গঅ সসুর ঘারে, সসুর ঘারে ভেসুরা বেজার।
ভেসুরা মরঅলে বেটি দসর ভেসুর পাউঅবে
ইঅ গউ নেহি পাউবে, নেহি পাউবে করমেকা রাইত।
করমেকা রাইত বাপু বছরে বছরে গউ
ইঅ গউ নেহি আউএই, নেহি আউএই মরঅলঅ মানুষ।
তরঅ সসুর ঘারে বেটি উঁচঅ নিচঅ পিঁড়হউআ
ইঅ গউ কাঁহা জাইএ, কাঁহা জাইএ রহঅবে ডাঁড়হাই।

লতে লতে করম গিত ২৮

৪৫)

কনে তকে গাইর দেলউ হউ
কনে তকে মাইর দেলউ হউ
কনে তকে দেলউ বনঅবাসে
করইআ ঝুঁড় ছাঁহরি রে।

সাসে মকে গাইর দেলা হউ
সএগাএঃ মকে মাইর দেলা হউ
সইতিনিএঃ দেলি বনঅবাসে
করইআ ঝুঁড় ছাঁহরি রে।

কিআ দসে গাইর দেলউ হউ
কিআ দসে মাইর দেলউ হউ
কিআ দসে দেলউ বনঅবাসে
করইআ ঝুঁড় ছাঁহরি রে।

রাঁধন দসে গাইর দেলা হউ
বাঁটন দসে মাইর দেলা হউ
চলঅন দসে দেলি বনঅবাসে
করইআ ঝুঁড় ছাঁহরি রে।

৪৬)

কনে দেলা আইড় পাইড় কনে দেলা সাড়ি সরমে মরি,
কনে দেলা বাজুব্বাএঃ কাপাড়ে টিকঅলি
মনঅ হরখি গেলি।
সসুর দেলা আইড় পাইড় ভেসুর দেলা সাড়ি সরমে মরি
সএগাএঃ দেলা বাজুব্বাএঃ কাপাড়ে টিকঅলি
মনঅ হরখি গেলি।
কেথিকেরি আইড় পাইড় কেথিকেরি সাড়ি সরমে মরি
কেথিকেরি বাজুব্বাএঃ কাপাড়ে টিকঅলি
মনঅ হরখি গেলি।
টসরেকা আইড় পাইড় পসরেকা সাড়ি সরমে মরি
লহাকেরি বাজুব্বাএঃ সিঁদুর টিকঅলি
মনঅ হরখি গেলি।

লতে লতে করম গিত ২৯

৪৭)

ছুটুছুটু আখড়া গটা গাঁউএক ভেসুরা
নাচে গেলে মকে ছলঅকে না বনে গউ ।
খাউআ পিআ করি সাঁখে জাঁউ জদি মনেক রিখে
নাহাই হেতি মকে উঠিকে বিহানে গউ ।
একে তঅ ফাটঅলঅ লুগা হিদে হুঁদে গটাই ভুগা
ভিজঅল দেখি মকে সাসে বাখানে গউ ।
হেঁক গাঁউএক বউআসিন কেসেকে নাচঅবঅ ইঠিন
এসন গাঁউএ মকে বিহা দেলা কনে গউ ।

৪৮)

নানহঅ নানহঅ বেতিকের ডালউআ বুনাঅলি সিলিরা,
পরবতি ফুলা লড়হে জাই ।
একঅ ফুলা লড়হলি দুইঅ ফুলা লড়হঅলি এহউ সিলিরা,
তিনি ফুলাএ সসুর ঘারেক লগ ।
সসুরা সঁগে নিহি জাব গউ সিলিরা,
হুঁকুআ বহেইতে দিনঅ জাই ।
ভেসুরা সঁগে নিহি জাব গউ সিলিরা,
বাটঅ ছাড়ইতে দিনঅ জাই ।
সঁঞাক সঁগে নেহি জাব গউ সিলিরা,
ঝগড়া লাগইতে দিনঅ জাই ।
দেউরাকর সঁগে হামে জাব গউ সিলিরা,
হাঁসইতে খেলইতে দিনঅ জাই ।

৪৯)

কাকরঅ আঁগনাই গাছঅ দারুন রে
সামলতা, কাকরঅ আঁগনাই চাঁপাফুল রে ।
দেউরাকর আঁগনাই গাছঅ দারুন রে
সামলতা, ননঅদিক আঁগনাই চাঁপাফুল রে ।
কেইসন কেইসন করঅএ গাছঅ দারুন রে
সামলতা, কেইসন করঅএ চাঁপাফুল রে ।
লহঅ লহঅ করঅএ গাছঅ দারুন রে
সামলতা, মহঅ মহঅ করঅএ চাঁপাফুল রে ।

লতে লতে করম গিত ৩০

৫০)

কাকরঅ হাঁখে রাঁগ রূপা আঁগুঠি
আঁগুঠি চমকি গেলা
কাকরঅ মুড়ে বউরা ফুলা
খঁপউআ গমঅকি গেলা ।
দাদাকর হাঁখে রাঁগ রূপা আঁগুঠি
আঁগুঠি চমকি গেলা
ভউজিকর মুড়ে বউরা ফুলা
খঁপউআ গমঅকি গেলা ।
কনোঁহি গড়হএ রাঁগ রূপা আঁগুঠি
আঁগুঠি চমকি গেলা
কাঁহাই ফুটঅএ বউরা ফুলা
খঁপউআ গমঅকি গেলা ।
বানিআহি গড়হএ রাঁগ রূপা আঁগুঠি
আঁগুঠি চমকি গেলা
বনোঁহি ফুটইএ বউরা ফুলা
খঁপউআ গমঅকি গেলা ।

৫১)

কনঅ বনে জাহেইর ঝাঁটি
কনঅ বনে জাইএ কাটি
কনঅ বনে রে সুগা জড়অলে পিরিতি
ফুটঅলঅ করইআ ফুল ছুটঅল পিরিতি ।
রনঅ বনে জাহেইর ঝাঁটি
বাদা বনে জাইএ কাটি
অরুন বনে রে সুগা জড়অলে পিরিতি
ফুটঅলঅ করইআ ফুল ছুটঅল পিরিতি ।
বাদা বন সহান করি
দাঁড়অ বন ঘুরাঘুরি
অহে বনে রে সুগা জড়অলে পিরিতি
ফুটঅলঅ করইআ ফুল ছুটঅল পিরিতি ।

লতে লতে করম গিত ৩১

৫২)

কাকরঅ গাথে লালমাটি গামঅছা

দেহিআ চমকি গেলা

কাকরঅ মাথে বউরাফুলা

খঁপউআ গমকি গেলা ।

দেউরাকর গাথে লালমাটি গামঅছা

দেহিআ চমকি গেলা

দেউরানিকর মাথে বউরাফুলা

খঁপউআ গমকি গেলা ।

কেইসন কেইসন করইএ লালমাটি গামঅছা

দেহিআ চমকি গেলা

কেইসন কেইসন করে বউরাফুলা

খঁপউআ গমকি গেলা ।

চকঅ মকঅ করঅএ লালমাটি গামঅছা

দেহিআ চমকি গেলা

মহঅ মহঅ করঅএ বউরাফুলা

খঁপউআ গমকি গেলা ।

৫৩)

বাপে মরঅ বিহা দেল সাত সমুনদর পার

অগউ - সমুনদর ভরঅলঅ, সমুনদর ভরঅলঅ ছইঅমাস ।

জাউআ জাউআ জাউআ ডালি উগলউ করমঅ ডালি

অগউ - কহরে ডালি, কহঅ ডালি দুখা সুখঅ বাত ।

কিআ কহঅবঅ ভাইরে দুখা সুখা বাত

অগউ - মাঞক বানার, মাঞ মরঅলঅ ছইঅ মাস ।

পাসে আসে রহে তেলঁ রকা বানার পাউএতেলঁ

অগউ - কিআ গউ বিধি, কিআ বিধি লিখঅলউ কপালে ।

৫৪)

কনঅ নদি বহইএ হবঅকি ডবঅকি -- উঁগা ছলছল

কনঅ নদি বহইএ নিরাধার ।

ছটঅ নদি বহইএ হবঅকি ডবঅকি -- উঁগা ছল ছল

বড়অ নদি বহইএ নিরাধার ।

লতে লতে করম গিত ৩২

৫৫)

পড়অলঅ ভাদরমাস লাগলঅ নইহর আস

ননদ গে এবে হামে জাব নইহর জে ।

কেসেকে জাউঅবে তঞ নইহর জে

ভউজি গে নেহি আউএ ভইআ তর জে ।

ভইআকর বাট ভালি গটা ভাদর বিতি গেলি

ননদ গে হদঅকি উঠঅতঅ হিআ মর জে ।

৫৬)

সালদহা রূপাই নদি অবঅকলে আউএই রে

অরে- মরঅ রে ভইআ, মরঅ ভইআ রহঅলঅ টেকাই ।

আনঅবঅ মঞ সিমইর কাঠ ছলঅবঅ মঞ নউকা

অরে- নউকাঞ রে চাপি, নউকাঞ চাপি নইহর চলি জাম ।

মাঝ নদি গেলে ভউজি নউকা ডুবি গেইল

অরে- পুরি গঅ গেলা, পুরি গেলা নইহরেকা আস ।

৫৭)

ডুঁগরিকা ধারে ধারে নজঅগলঅ ডারিআ

তড়ি লিহা, তড়ি লিহা সাঁউঅর ফুলেকে নেউআর

অ-কি তড়ি লিহা ।

তড়েকা তড়অলি ঋঞা ভরি তড়অলি

গাঁথি লিহা, সাঁউঅর ফুলেকেরি হাইর

অ-কি গাঁথি লিহা ।

গাঁথেকা গাঁথঅলি হালা হালা গাঁথঅলি

পিঁধি লিহা, পিঁধি লিহা সাঁউঅর ফুলেকেরি হাইর

অ-কি পিঁধি লিহা ।

পিঁধেকা পিঁধঅলি ঘেঁচা ভরি পিঁধঅলি

ছিঁটি গেলি, ছিঁটি গেলি সাঁউঅর ফুলেকেরি হাইর

অ-কি ছিঁটি গেলি ।

লতে লতে করম গিত ৩৩

৫৮)

মেঘঅ আঁধারি রাতি, সুবলঅ না জাই
সমই বানঅ দিনঅ জাই।
এহে লেখে কতেক জুগঅ জাই
সমই বানঅ দিনঅ জাই।
জেইসন পুননিমাক চাঁদ জেহরে খিআই
সমই বানঅ দিনঅ জাই।
চাঁদ লেখে জাবে মুরুছাই
সমই বানঅ দিনঅ জাই।
ফুলা লেখে জাবে গসুআই
সমই বানঅ দিনঅ জাই।

৫৯)

কনে দেলা করম সাড়ি কনে দেলা করম ডালা
ইঅগউ- কনে গউ দেলা, কনে দেলা সিঁথেকা সিঁদুর।
সসুর দেলা করম সাড়ি সাস দেলা করম ডালা
ইঅগউ- সঁঞাঞ গউ দেলা, সঞাঞ দেলা সিঁথেকা সিঁদুর।
করম সাড়ি ছিঁটি গেলা করম ডালা ভাঁগি গেলা
ইঅগউ- রহি গউ গেলা, রহি গেলা সিঁথেকা সিঁদুর।

৬০)

বাগমুড়িক পাহাড়ে গাড়ার শুড়ুর পাখনা
কাঁহা জাহিস রে নদি সুতঅনা
সুনিলে বিছিআক বাজঅনা।
কাঁধে ছাতা গড়ে জুতা কানে আহউ ফুল গঁজা
কাঁহা জাহিস রে নদি সুতঅনা
হিলউ ধতি ডলউ ফুদঅনা।
বুঢ়া বাপেক বেটা হেবে অসাইরদা সিকারে জাবে
কাঁহা জাহিস রে নদি সুতঅনা
সিকারে বিকার করিস না।

লতে লতে করম গিত ৩৪

৬১)

মুরগাহি বাঁগ দেলা ভেলা ভিনসার হউ
চালা দেউরা সঁগদে মল্হআ বিছে জাব হউ।
কাকর বিছল মল্হআ উলাই ভুজি খাব হউ
কাকর বিছল মল্হআ লাঠা কুটি খাব হউ।
দেউরাক বিছল মল্হআ উলাই ভুজি খাব হউ
ভউজিক বিছল মল্হআ লাঠা কুটি খাব হউ।

৬২)

মালিনি গে, কাঁহা মালিন বাজঅইএ করঅতাল
কাঁহাহি বাজঅইএ চলঅ নাগঅড়া
সুনে মালিনি গে
কাঁহা মালিন বাজেই করঅতাল।।
আখঅড়াহি বাজঅইএ চলঅ নাগঅড়া
সুনে মালিনি গে
রাজা ঘারে বাজেই করঅতাল।।
কেসন কেসন বাজঅইএ চলঅ নাগঅড়া
সুনে মালিনি গে
কেসন কেসন বাজেই করঅতাল।।
গেড়েন গেদা বাজঅইএ চলঅ নাগঅড়া
সুনে মালিনি গে
ঝামঅ ঝামঅ বাজেই করঅতাল।।

৬৩)

বড়ি মনে আউঅলি গাউঅলি গিত রে
ঝাঁকি দিহা হউ মইআ আঙলি নাচইআ
বড়ি রিঝ লাগঅলি দইআ।
একঅ কলি গাউঅলি দুইঅ কলি গাউঅলি
তিনঅ কলিএ গউ মর হদঅকে ছতিআ
বড়ি রিঝ লাগঅলি দইআ।
আন গাউএক লক হেকি না করিহা ফেঁকাফেঁকি
চাইরঅ কলিএ গউ মইআ গিতঅ সিরাইহা
বড়ি রিঝ লাগঅলি দইআ।

লতে লতে করম গিত ৩৫

৬৪)

ছটঅ মটঅ টকঅরা হার জতে ছকঅরা
ভিজি জাতউ বাবু ঐড়িকর ধতিআ
ভিজি জাতউ ।
হার জতে নেহি জানে বাঞে দেহিনে
ভিজি জাতউ বাবু মুড়েকা পাগঅড়িআ
ভিজি জাতউ ।
আঁতঅরে আঁতঅরে ঘুরি মুড়েক ঘঁগ গেলা গিরি
ভিজি জাতউ বাবু চাঁচঅরঅ চুলিআ
ভিজি জাতউ ।

৬৫)

ছুটমুট কাড়উআ মালাদহে লেই গেলা
ইঅগউ পুরইনপাতে করেই টলঅমল ।
মারঅবঅ রে কাড়উআ তরি জিআ বধঅবঅ
ইঅগউ তরি সিংগে কাঁকইআ কুঁদু ।
দেউরা কহই ভউজি অতি সুন্দর কাঁকইআ
ইঅগউ উঠা ভউজি ঝাড়ল বাঁধল কেস ।
কেইসে হামে বসঅবঅ কেইসে হামে উঠঅব
ইঅগউ কেইসে বাঁধব ঝাড়ল বাঁধল কেস ।
কমরে বসঅবে ভউজি হাঁঠুএ উঠবে
ইঅগউ হাঁখে বাঁধবে ঝাড়ল বাঁধল কেস ।

৬৬)

বিহা জে দেলে দাদা কাঁসাই নদি পারে
ভাই একা ঘারে
দাদা, জলদি আনে জাবে ভাই একা ঘারে ।
বান জদি আউএক দাদা নউকা লেইএ জাবে
করমা খেলে
দাদা জলদি আনে জাবে করমা খেলে ।
জুতা জদি নিহি দাদা সুধা গড়ে জাবে
করমা খেলে
দাদা জলদি আনে জাবে করমা খেলে ।

লতে লতে করম গিত ৩৬

৬৭)

আঁকা বাঁকা রে বাঁকা কুরঅথি
ভুজে বসেই ছটঅকি ননঅদ ।
ভুজেইতে ভুজেইতে ননঅদ পড়ি হেইল
লাজে নেহি গেলা সসুর ঘার ।
লে ননঅদ তেল সিঁদুর কাঁকউআ
চালা লেগি রাখঅব সসুর ঘার ।
অহে গুনঅ গাহঅবে গে ননঅদি
ভাদঅর মাসে আনঅবঅ ঘুরাই ।

৬৮)

মাছেক নেতে দেখঅলঅ মাগুর মাছা রে
আর, বিনা পানিআঞ মাছাঞ খেইল করেই রে ।
সাঁপেক নেতে দেখঅলঅ খরিস সাঁপা রে
আর, বিনা বেদিআঞ সাঁপাঞ খেইল করেই রে ।
গাছেক নেতে দেখঅলঅ পিপড়অ গাছা রে
আর বিনা বাসাতে পিপড় গাছ ডলেই রে ।

৬৯)

কাকর লাগি ডাইল ভাত
কাকর লাগি লেটঅ রে
কাকর লাগি জনহাইর ভুজা
কাকর লাগি ঠেপঅ রে ।
দাদাক লাগি ডাইল ভাত
ভউজিক লাগি লেটঅ রে
নাচঅনিরাক জনহাইর ভুজা
দেখঅনিরাক ঠেপঅ রে ।

৭০)

বড়অ নদিক হদহদি
ছটঅ নদিক ফেনা হে
চলেইতে চলেইতে ধনিক
হিলেই কানেক সনা হে ।

লতে লতে করম গিত ৩৭

৭১)

নদি পারে বিহা দেইল
কবছ নি আনে গেইল
কহি দিহা হউ মর দাদাকে ছজুরে ।
বড়ি দুখ বিপতি হামরে ।
দিনেক মাড় সাঁঝে রাখি
ননঅদিনিঞ দেই বাঁটি
লুলহা ডুবৈই গউ মর সেহ ডুভা মাড়ে ।
বড়ি দুখ বিপতি হামরে ।
মরঅ সঞাআঁ হেকে গুঁগা
ননঅদে দেখাউএই ঠেঁগা
সসুর ভেসুর গউ মর বাহারে বাহারে
বড়ি দুখ বিপতি হামরে ।

৭২)

সুখলঅ খেতে দেউরা বকঅলি চরহউ
এহঅ সনঅ, দেউরা সুভঅ নি বুঝাই ।
চালা নঅ জাব দেউরা মালনচঅ দেসে
বছর খেপি দেউরা আউঅবঅ ঘুরি ।
সেহঅ জে দেসে দেউরা ফরা ফুলা ঝবরলঅ
দিনা পুহাই দেউরা আউঅবঅ ঘুরি ।

৭৩)

এক খাঁড়া পুঁঠি মাছ
কিনা দেইএ রাঁধ গউ
বাগাল বঁধু মরি গেলে
কিনা কহি কৌদঅ গউ ।

৭৪)

বরিসাঞ রপলঁ ধান
রপা মাসে গাছি হে ।
ভাদরে মাতালাক কাড়া
ঘারে উড়েই মাছি হে ।

লতে লতে করম গিত ৩৮

৭৫)

কাঁহাই উপজলঅ রিঝাকেরি অড় মাঠাকেরি অড় ।
(আর) কাঁহাই উপজলঅ সাঁউঅরি রে ।
আখড়াই উপজলঅ রিঝাকেরি অড় মাঠাকেরি অড়
(আর) মাঞেক কঁখে উপজলঅ সাঁউঅরি রে ।।
আনেক সঁঞা আনেক সঁঞা রিঝা খেলে গেইল মাঠা খেলে গেইল
মর সঁঞা মুহজারা হার জতে গেইল ।
এহে ঠেঁআ হারুআকে সাঁপেই না ধরেই বাঘেই না খাই,
(আর) এহে বাঁড়িআ বরঅদাকে চরেই না লেগে ।।

৭৬)

কাকর ডরে রে হাঁথি বন সামহালে, বন সামহালে
(আর) কাকর ডরে রে হাঁথি কাদা লেসঅলে ।
লুতিক ডরে রে হাঁথি বন সামহালে, বন সামহালে
(আর) মাছিক ডরে রে হাঁথি কাদা লেসঅলে ।

৭৭)

পহিলঅ ভাদরে গেলঅ নইহরে
সঁগি ভাবে, সঁগি ভাবে হউ পিআ ভুলি রহঅলি
তকে পিআ বিসরঅ গেলি ।
সঁগি সঁগে হেলি মেলি ভাদরঅ কাটি গেলি
সঁগি ভাবে, হউ পিআ দিলা খউআলি
তকে পিআ বিসরঅ গেলি ।
করম রাজা পুজঅলি পাঁতানাচে মাতঅলি
সঁগি ভাবে, সঁগি ভাবে হউ পিআ সতে ভুলঅলি
তকে পিআ বিসরঅ গেলি ।
না দিহা গাইর মাইর মাখি লিহা এহে বার
সঁগি ভাবে, সঁগি ভাবে হউ পিআ ইঁদ ছাতা দেখঅলি
তকে পিআ বিসরঅ গেলি ।

লতে লতে করম গিত ৩৯

৭৮)

বান আইলেক বইরসা আইলেক
বহাই আউলেক অল রে
অলেক করম হেঁকাহেঁকি
মাছেক করম ঝর রে ।

৭৯)

পুরুব দেসে নামহএ বহি বেপারিআ
বউরা তরে ডেরা লেলা
বউরা ফুল ফুটেই খারাখারি
বিতে হাইর গাঁথঅলি ।
কাকর লাগি আনঅএ মুঠি মুঠি সাঁখঅআ
কাকর লাগি সাড়িআ
কাকর লাগি সিঁথেকা সিঁদুর
বিতে হাইর গাঁথঅলি ।
বহিন লাগি আনঅএ মুঠি মুঠি সাঁখঅআ
মাএকর লাগি সাড়িআ
ধনিক লাগি সিঁথেকা সিঁদুর
বিতে হাইর গাঁথঅলি ।

৮০)

দুধা জে দুহঅলি, চুলহাই রাখঅলি
আইগ মাগে গেরই দেউরা
কনঅ বিলাইএ দুধা খাইএ গেলা ।।
ফুলা জে তড়অলি, ডালাহি রাখঅলি
পানি আনে গেরই দেউরা
কনঅ ছাগরিএ ফুলা খাইএ গেলা ।
মালা জে গাঁথঅলি, সিঁকাহি রাখঅলি
কুলহি বুলে গেরই দেউরা
কনঅ রসিকাএ মালা পিঁধি গেলা ।
সিঁদুরা কিনঅলি, কিআহি রাখঅলি
গবর বিছে গেরই দেউরা
কনঅ সইতিনিএ সিঁদুর পিঁধি দেলা ।

লতে লতে করম গিত ৪০

৮১)

জাউআ তরে জনম লেলা মালিনি বোটিআ
অ-রে ডালা লেইএ, ডালা লেইএ ফুলা লড়ে জাই ।
লড়িএ বিছিএ মালিন হেলা সমতুল দইআ
অ-রে গাঁথে লাগঅল, গাঁথে লাগঅল ফুলেকেরি হাইর ।
সাঁকটঅ গলিআএ ঘড়উআ দউড়াইএ দেল
অ-রে ছিটি গেলা, ছিটি গেলা ফুলেকেরি হাইর ।
আড়অ পড়সিআ মাএঅ বহিনিআ
অ-রে লকি দিহা, লকি দিহা ফুলেকেরি হাইর ।
কইসে হামে লকঅবঅ ফুলেকেরি হাইর দইআ
অ-রে করাএ আহে, করাএ আহে বোটা দুবরাজ ।
বোটা দুবরাজকে ভুঁএ লটাই দেবেএ
অ-রে তাউএ লকম, তাউএ লকম ফুলেকেরি হাইর ।

৮২)

উঁগঅরি কা ধারে ধারে বুনলঅ মএ কুরথি
অহঅরে, সেহঅ রে কুরথি হনুএ বিছিবিনি খাই ।
মারঅবঁ রে হনু পিটঅবঁ রে হনু
অহঅরে, তরি রে চামে, তরি চামে মাদঅরি ছারাই ।
কাকঅর মাদেইর বাজঅএ তাঁগ ধিপিঁগ তাঁগ দইআ
অহঅরে কাকঅর মাদেইর, কাকঅর মাদেইর বাজেই নিরাধার ।
সএগক মাদেইর বাজঅএ তাঁগ ধিপিঁগ তাঁগ দইআ
অহঅরে ভইআক মাদেইর, ভইআক মাদেইর বাজেই নিরাধার ।

৮৩)

কনহ টুগরিকে লিহি লিকি বাস দইআ
অরে কন নগর কন নগরেকা ডম ।
বানসা টুগরিকে লিহি লিকি বাস দইআ
অরে খেইলদা নগর, খেইলদা নগরেকা ডম ॥
একঅ ছাতা বুনল ডমিন দুঅ ছাতা বুনল
অরে তিনি রে ছাতা, তিনি ছাতাই নাথেকে বেসর ।

লতে লতে করম গিত ৪১

৮৪)

টুগঅরি কা ধারে ধারে ঝারনা ফুটঅএ গেইল
অহঅরে চালা হউ ভউজি, চালা ভউজি পানি আনে জাব।
ডাঁড়িআ না সঁগরঅএ ঘইলা না ভরঅএ
অহঅরে চালা হউ ভউজি, চালা ভউজি ঘারা ঘুরি জাব।
ডাঁড়িআ সঁগঅরি গেইল ঘইলা ভরঅএ গেইল
অহঅরে কনে হউ ভউজি, কনে ভউজি দেতা হউ আলগাই।
টুগঅরি কা ধারে ধারে সএগা আউএ ধিরে ধিরে
অহঅরে অরাই হউ ভউজি, অরাই ভউজি দেতউ আলগাই।

৮৫)

গরি সাঁউঅরি দিঅ পানি আনে গেইল রে।
হেঁ ভাই/ হাইরে হাই, বেঁগা রাজাএ হেঁকেই ডাঁড়ি ঘাট রে।
ছাড়ু ছাড়ু বেঁগা রাজা এহে ডাঁড়ি ঘাট রে
হাইরে ভালা, ঘেইলা ডুবাইএ ঘারা জাব রে।
শেঁহি ছাড়ুঅবঅ হামে এহে ডাঁড়ি ঘাট রে
হেঁ ভালা, হামে লেবউ হুটঅকি বহিন রে।
একি ডাঁগঅ মারঅলঅ দিঅ ডাঁগঅ মারঅলঅ
হাইরে ভালা, তিনি ডাঁগে বেঁগা টিডুআইল রে।
কেহ লেলা ঝুড়ি ঝাঁটি কেহ লেলা আইগ রে
হাইরে ভালা, কেহ লেলা বেঁগাকেরি ঝাইট রে।
নঅ দিনে ঝারপাত দসঅ দিনে ঘাট রে
হাইরে ভালা, গারঅ দিনে কুটুমঅ ফলহার রে।

৮৬)

কাঁহা নাভইএ নেজ নেজার হনুমান
অরে কাঁহা ত নাভে, কাঁহা ত নাভে কুদা বাঘ।
বনে বাড়ে নাভইএ নেজ নেজার হনুমান
অরে বেড়া রে ভুঁইএ, বেড়া ভুঁইএ নাভে কুদা বাঘ।
কিআ কিআ ঝাউঅতউ নেজ নেজার হনুমান
অরে কিআ রে কিআ, কিআ কিআ ঝাউঅতউ কুদা বাঘ।
ফর ফুলা ঝাউঅতউ নেজ নেজার হনুমান
অরে গরু রে বাছুর, গরু বাছুর ঝাউঅতউ কুদা বাঘ।

লতে লতে করম গিত ৪২

৮৭)

কনে কড়াউলা অহইরা পখইরা
মধু মালিনি গে
কনে কড়াউলা চুঁআ ডাঁইড়।
ভইআএঃ কড়াউলা অহইরা পখইরা
মধু মালিনি গে
সঁএগাএঃ কড়াউলা চুঁআ ডাঁইড়।।
কেইসন করইএ অহইরা পখইরা
মধু মালিনি গে
কেইসন করইএ চুঁআ ডাঁইড়।
গহগহঅ করইএ অহইরা পখইরা
মধু মালিনি গে
ধপঅ ধপঅ করইএ চুঁআ ডাঁইড়।।

৮৮)

কতেক পানিই হেললে কতেক পানিই পাইরালে
অরে কতেক রে পানি কতেক পানিই হেজাউলে বেসর।
হাঁঠু পানিই হেললে কমর জখে পাইরালে
অরে মুড়েক জখে, মুড়েক জখে হেজাউলে বেসর।।

৮৯)

কেরিআ পাইড় লাল সাড়ি তঁই কাঁহা গেলে উড়ি
রে তর লাগি আইখে বহে লর
জেসন বহে সরাবন ভাদর।
রহে হেলিস ঘারে ঘাটে ঘুরে তেলিস হাটে বাটে
সেহ দেখি, লগেক লাগে হেলেন নজর।
আই জে মই বাঁচল জেসন হিটল লুগা গিঞ্চল
সেহ দেখি - লক হাঁসিকে অঝর
তর লাগি আইখে বহে লর
জেসন বহে সরাবন ভাদর
হাইরে জেসন বহে সরাবন ভাদর।।

লতে লতে করম গিত ৪৩

৯০)

জাউআ ডালি জাউআ ডালি

উঠলঅ করমেণ বালি

অরে - কহরে ডালি কহ ডালি দুখ সুখ বাত।

কিআ কহব বহিন দুখ সুখ বাতঅ

অরে - মাইঅ মরলঅ ছঅ মাস

হাইরে হাইরে বিখিরে বিখনতা

অরে - কিআ রে বিখি কিআ বিখি লিখলে হামর

আসে পাসে রহেতেল রকা খভেইর পাউএতেল

অরে - ছঅ মাসে মাইএকে খভেইর।

৯১)

জেহ ন বর্নে ভাইরে চিমট না সঁসরইএ

অরে - সেহ রে বর্নে, সেহ বর্নে ভইআ চলি জাঁই।

লেহ ভইআ পানি গিঁড়হা সহদর ভাইঅ

অরে - খাইএ গউ লিহা খাইএ লিহা দহি দুখা ভাত।

কেসে হামি খাম বহিন দহি দুখা ভাত

অরে - মাইঅ মরলঅ ছঅ মাস

হাইরে হাইরে বিখিরে বিখনতা

অরে - কিআ রে বিখি কিআ বিখি লিখলে হামর

আসে পাসে রহেতেল রকা খভেইর পাউএতেল

অরে - ছঅ মাসে মাইএকে খভেইর।

মাইঅ মরলি ভাইরে খভেইর না দেউঅলে

অরে - হামেরে হেল হাম হেল জনম টুঅর

মনে জদি হেতউ ভাইরে দসে পাঁচে আউঅবে

অরে - মরল সরল এহে সসুর ঘার।

৯২)

একঅ গাছে পাঁচঅ ফর না করা ভাই গরতগল

অরে কেহ হিতঅ, কেহ তিতঅ কেহ মধুরস।

মাইএ তর হিতঅ, বহিনি তর তিতঅ

অরে ধনি রে তরঅ, ধনি তরঅ হেকউ মধুরস।

লতে লতে করম গিত ৪৪

৯৩)

বাগে মকে বিহা দেল সমুনদর উপারে

অরে- সমুনদর ভরলঅ ছঅ মাস

আনব মই সিমের কাঠ ছলব মই লউকা

অরে- লউকা রে চাপি, লউকা চাপি জাব রে নইহর

মাঝ নদি গেলে বহ ডুবি জাতউ লউকা

অরে- রহি গউ জাতউ, রহি জাতউ নইহরেকা সাখ।

টুগরিকা ধারে ধারে ঝারনা ফুটিঅ গেল

অরে- ইঁচা পাঠিক লাভাইড় লাগি গেল।

জালুআর্হি টারবঅ টঠেরাহি ভরবঅ

অরে- ঘারা লেগি দেব ডবকাই।

৯৪)

কিআ লাগি গরজইএ বাঘা বাঘিনা রে

অরে- কিআ রে লাগি হামলাইএ গাই

খাইএক লাগি গরজইএ বাঘা বাঘিনা রে

অরে- বাছুরা লাগি, বাছুরা লাগি হামলাইএ গাই।

৯৫)

বাড়ি হেঁঠে রেল চলে গরি বোটি জাঁতাই মরে

অরে- দেখে রে আউলা দেখে আউলা সসুর ভেসুর

সসুর কহে মাটি দেব ভেসুর কহে কাঠ দেব

অরে- সইআ গঅ কহে সইআ কহে সগে চলি জাম।

৯৬)

পুরুবে পছিমে দইআ নাভল মেজুরা

অরে- মেজুরা নাচলে জাই।

দেব গে মেজুরা আঁত্তর জঁখে বিছিআ

অরে- মেজুরা নাচলে জাই।

দেব গে মেজুরা হাঁথেক জঁখে টাড়উআ

অরে- মেজুরা নাচলে জাই।

দেব গে মেজুরা গড়েক জঁখে বাঁকআ

অরে- মেজুরা নাচলে জাই।

লতে লতে করম গিত ৪৫

৯৭)

টুগরিকা ধারিআঞ একা ঘারা তাঁতি

অরে- বুনে গঅ লাগল, বুনে লাগল পেড়িআ পাঁচন।

আঁচরে দিহা তাঁতি চাঁদঅ সুরুজ গঅ

অরে- ডেড়হি বাটে, ডেড়হি বাটে সাতঅ সইতিন।

আঁচর দেখি গরি বেটি খুলুর খুলুর হাঁসে

অরে- ডেড়হি রে দেখি, ডেড়হি দেখি আইথে বহে লর।

৯৮)

কাঁহা উঠলে পরভু, কাঁহা বইসলে গঅ

অরে- কাঁহা হউ পরভু, কাঁহা পরভু খেপলে গঅ রাইত।

আখড়াহি আহেক ধনি দসঅ ভাইএক বসাগত

অরে- তাঁহি গঅ ধনি, তাঁহি ধনি খেপল গঅ রাইত।

সেহ কহলে পরভু নেহি পেতিআম গঅ

অরে- ছুঁএ হউ পরভু, ছুঁএ পরভু তাঁবা রে তুলসি।

তাঁবা তুলসি ছুঁলে হামে মরি জাইঅবঅ

অরে- ছুটি গঅ জাতউ, ছুটি জাতউ সিঁথেকে সিঁদুর।

সিঁথেকে সিঁদুর পরভু সেহ হামে সহঅবঅ

অরে- নিহি গঅ সহম, নিহি সহম সইতিনেকর ঝাল।

জেসন র়েগেনিক কাঁটা তেসন সইতিনেকর ঝাল

অরে- সেহঅ রে ঝালজ, সেহঅ ঝালঅ সহলে না জাই।

৯৯)

কনঅ বিরিখা তরে সঁঞা মরঅ ভিজইএ

ছতিআঞ ঢরকি গিরে লর।

নিম বিরিখা তরে সঁঞা মরঅ ভিজইএ

ছতিআঞ ঢরকি গিরে লর।

১০০)

কারি ন গরি ভঁইসি পাড়েইর গঅ

চরে গেলা কাঁস নদিক পার।

চরিকে বাঝিকে ভঁইসি ঘুরল গঅ

বরা তরে লেলা বাথান।

কনেঁ মর বাঁধতঅ ভঁইসিকে কনেঁ মর ছাঁদঅতঅ গঅ

কনেঁ মরঅ জাইঅতউ দুহনে।

সসুর মরঅ বাঁধত ভঁইসিকে ভেসুর মরঅ ছাঁদঅতঅ গঅ

সঁঞা মরঅ জাইঅতউ দুহনে

কনেঁ মরঅ আঁচঅ রে দেতা কনেঁ মরঅ ধিপত গঅ

কনেঁ ধনি জাইঅতউ বেচনে।

সাসে মরঅ আঁচঅ রে দেতা ননদি মরঅ ধিপত গঅ

হামে ধনি জাইঅতঅ বেচনে।

দহি লিহা দুধা লিহা ডাকে গউআলিনেঁ গঅ

মরঅ দুধে অমরিতেক জড়েইন।

একঅ কুলহি বুলল গউআলিন, দিঅ কুলহি বুললঅ গঅ

তিনি কুলহিএ মুহঅ ত না খলল।

১০১)

কনেঁ মরঅ ছলইএ কুঁচি কপাট দইআ

অরে- কনেঁ মরঅ, কনেঁ মরঅ ছলে রে জাহাজ।

ভইআঞ মরঅ ছলইএ কুঁচি কপাট দইআ

অরে- সঁঞাএ রে মরঅ, সঁঞাএ মরঅ ছলে রে জাহাজ।

কনঅ ধনি সুতইএ কুঁচি কপাট দইআ

অরে- কন রে ধনি, কন ধনি সুতে রে জাহাজ।

ভউজি ধনি সুতইএ কুঁচি কপাট দইআ

অরে- হামে রে ধনি, হামে ধনি সুতে রে জাহাজ।

কেইসন করইএ কুঁচি কপাট দইআ

অরে- কেইসন রে করে, কেইসন করে কুঁদলঅ জাহাজ।

ঝিকিমিকি করইএ কুঁচি কপাট দইআ

অরে- টলঅ রে মলঅ, টলঅ মলঅ কুঁদলঅ জাহাজ।

১০২)

হেরিহর গবরে ঘারারে আনগা লিপল
অরে- মরি গউ নইহরে বিছিআকেরা বড়ি সাদ।
হউঅতঅ বিহান সখি পসরতউ হাট গউ
অরে- হাটঅ রে মাঝে, হাটঅ মাঝে লেইএ পহিরব।
হাটআকে মাঝউআ বড়িরে নটখটিআ
অরে- লাগি গউ গেলা, লাগি গেলা বিছিআ কা হাট।
জেহ না দেসে বাবা বিছিআ না উপজল
অরে- সেহঅ রে দেসে, বরদি ছিতিছরি লেল।

১০৩)

খিলঅ খেতে বুনল মঁঞ ঝগড়ি
দসর খেতে জিরাইল সাগ।
ঝঁইছা ভরি তড়ল মঁঞ ঝগড়ি
ফঁক্ষরা ভরলঅ জিরাইল সাগ।
কাঁটাঞ লাগল হরহরিআ
ঝগড়ি ত গেলা রে ছিরিআই।
আনু গে ননদি সুপ বাড়িনিআ
ঝগড়ি লেহ রে উঠাই।

১০৪)

কন বনে গেলা সুগা কন ফর খাউঅলে
ইঅ গউ কন রে বনে, কন বনে করলে সাঁথান
বিজুবনে গেলে সুগা বাছি ফর খাউঅলে
ইঅ গউ অরুন রে বনে, অরুন বনে করলে সাঁথান।

১০৫)

বড় দাদাক দুআইরে এক হাঁঠু কাদা লউ
ছলকি বাহরালা গৌতা মাছ লউ।
বাহরাঞ গৌতা বাহরাঞ গৌতা পলইএ চাঁপবঁ রে
পলইএকর মাছ গিলা দনাঞ টিপবঅ রে।

১০৬)

টুগরিকা ধারে ধারে বুনল মঁঞ কুরথি।
(খিল গড়া জতি জতি বুনল মঁঞ কুরথি)
অরে- সডে রে হনু, সডে হনু বিছিবিনি খাই।
মারবঁ রে হনু পিটবঁ রে হনু
অরে- তরঅ রে চামে, তরঅ চামে মাদরি ছাহব।
কাকর মাদইর বাজইএ তাঁগ ধিপিগ তাঁগ দইআ
অরে- কাকরঅ মাদইর, কাকর মাদইর বাজে নিরাধার।
ভইআক মাদইর বাজইএ তাঁগ ধিপিগ তাঁগ দইআ
অরে- সঁঞাক মাদইর, সঁঞাক মাদইর বাজে নিরাধার।

১০৭)

কনে মরঅ রপইএ রপনি বাগান দইআ
অরে- কনে রে মরঅ, কনে মরঅ রপে ফুলুআইর।
ভইআঞ মরঅ রপইএ রপনি বাগান দইআ
অরে- সঁঞাঞ রে মরঅ, সঁঞাঞ মরঅ রপে ফুলুআইর।
কইসন করইএ রপনি বাগান দইআ
অরে- কইসন রে করে, কইসন করে ফুলুআইর।
হরঅ হরঅ করইএ রপনি বাগান দইআ
অরে- মহঅ রে মহঅ, মহঅ মহঅ করে ফুলুআইর।
কনঅ ধনি সেউঅইএ রপনি বাগান দইআ
অরে- কনঅ ধনি, কনঅ ধনি সেউএ ফুলুআইর।
ভউজি ধনি সেউঅইএ রপনি বাগান দইআ
অরে- হামে গঅ ধনি, হামে ধনি সেউঅ ফুলুআইর।

১০৮)

কনঅ বরনে রাজি করে ধপঅ ধপঅ
অরে- কনঅ বরনে মনঅ জাই।
সেউআল বরনে রাজি করে ধপঅ ধপঅ
অরে- সিঁদুরঅ বরনে মনঅ জাই।

১০৯)

কনৈ মরঅ জতইএ খেতঅ না গঠঅ রে
 অরে- কনৈ মরঅ, কনৈ মরঅ জতে পিছুআড়।
 ভইআএ মরঅ জতইএ খেতঅ না গঠঅ রে
 অরে- সঁঞাএ মরঅ, সঁঞাএ মরঅ জতে পিছুআড়।
 কনৈ মরঅ বুনঅইএ রাইঅ সরিসা রে
 অরে- কনৈ রে মরঅ, কনৈ মরঅ বুনৈ ভেঁড়রা।
 ভইআএ মরঅ বুনঅইএ রাইঅ সরিসা রে
 অরে- সঁঞাএ মরঅ, সঁঞাএ মরঅ বুনৈ ভেঁড়রা।
 কনঅ ধনি মাখইএ রাইঅ সরিসা রে
 অরে- কনঅ রে ধনি, কনঅ ধনি মাখে ভেঁড়রা।
 ভউজি ধনি মাখইএ রাইঅ সরিসা রে
 অরে- হামে রে ধনি, হামে ধনি মাখে ভেঁড়রা।

১১০)

আঝুকা রাইত জাই সুতি বসি লিহা রে
 দেখি জাবে বহিনি বিপইত।
 আলইআকে মাড় ভাইরে পালুআকে তিঅন রে
 দেখি জাবে বহিনি বিপইত।
 সেহ সুনি ভাই মর টাঁগা লেইএ গেল রে
 কাটে লাগল পালইআকে ডাইর।
 সেহ দেখি সাসু মরঅ ঢাকি লেইএ গেল রে
 দুহরে লাগল পালইআকে সাগ।
 আইআ খউকি সাসু গউ বাবা খউকি সাসু
 তঁহে সাসু ঢাকি লেইএ জাইস।
 সেহ দেখি ভইআ মর টাঁগা লেই দেল ঝাঁপ রে
 ঢাকি ছাড়ি পাড়াল সাসু ঘার।

লতে লতে করম গিত ৫০

১১১)

আনগা বাড়ইতে সাসু বাড়হিনিঅ থিআই গঅ
 সাসু ননদে পাড়ে গাইর।
 কিআ লাই গউ সাসু মকে গাইর দিহা গউ
 আনি দেবন বদলঅ বাড়হিন।
 ভাট বল ভিখারি তঁহি মর ভইআ রে
 এহঅ বানার লেইএ জাঁঞ।
 বাপঅ বুঢ়আক পােসে বতি না সুনাইস রে
 দরবারে করে হেঁঠম মুড়।
 মাঁঞ বুঢ়িআক পােসে বতি না সুনাইস রে
 হেঁইড়সারে চুমসি মরতি।
 সাতঅ ভউজিকর পােসে বতি না সুনাইস রে
 ডাঁড়ি ঘাটে করতা চঅই।
 সাতঅ ভইআকর পােসে বতিআ সুনাইবে রে
 চলি জাতা মহলিকা ঘার।
 সেহ সুনি ভইআ মরঅ চলল মহলি ঘার রে
 করে লাগল বাড়িনেকা মল।
 মহলি রে মহলি তঁইঅ মর ভইআরে
 কহেঁ মহলি বাড়িনেকা দাম।
 কিআ কহবঁ মাহতঅ বাড়িনেকা মল হউ
 জইএ বাড়িন তইএ পইলা ধান।
 আঙএ আঙএ আউএ বাড়িনেকা ভার রে
 তাকর পেছুএ সহদর ভাই।
 জখন ভাই মরঅ গাঁউএকেরি মুড়াএ গউ
 তখন সাসে ঘটিআ লুকাউএ।
 কিআ গউ সাসু ঘটিআ লুকাউইস গউ
 মরঅ ভইআ জুতা পিঁধি আউএ।
 জখন ভাই মর পখরিকা পিঁড়ে গউ
 তখন সাসে মদিলা লুকাউএ।
 কিআ গউ সাসু মদিলা লুকাউইস গউ
 মরঅ ভইআ ঘড়াএ চাপি আউএ।
 জখন ভাই মরঅ মাঝ আনগাঁঞ গউ
 তখন সাসে চুলহাএ পানি নুঁড়ে।

লতে লতে করম গিত ৫১

কিআ গউ সাসু চুলহাঞ পানি নুড়িহা গউ
 মর ভইআ পান খালে আউএ।
 জখন ভাই মর দুআরাহি ডাঁঢ়াই গউ
 তখন সাসে চুলহাঞ মুড় ভরে।
 কিআ গউ সাসু চুলহাঞ মুড় ভরিহা গউ
 দেখি লিহা বদলঅ বাঢ়িন।
 আইআ খউকি বহু গউ ভইআ খউকি বহু
 হামে বহু লাজে মরি জাঁউ।

১১২)

বারঅ বছর বাদে সসুর, ভইআ লেগে আইল গউ
 হামে সসুর জাব গউ নইহর।
 হামে নেহি জান বহু, তহরি বিদাই গউ
 বুঝি লিহি আপঅনঅ সাসু।
 বারঅ বছর বাদে সাসু, ভইআ লেগে আইল গউ
 হামে সাসু জাব গউ নইহর।
 হামে নেহি জান বহু, তহরি বিদাই গউ
 বুঝি লিহি আপঅনঅ ভেসুর।
 বারঅ বছর বাদে ভেসুর, ভইআ লেগে আইল গউ
 হামে ভেসুর জাব গউ নইহর।
 হামে নেহি জান বহু, তহরি বিদাই গউ
 বুঝি লিহি আপঅনঅ সঁঞা।
 বারঅ বছর বাদে সঁঞা, ভইআ লেগে আইল হউ
 হামে সঁঞা জাব হউ নইহর।
 জাবে তঅ জাঞ ধনি, আপনঅ নইহর গে
 করম বাসি আনঅবঅ ঘুরাই।

১১৩)

কাঁহা পাউঅলে ভইআ করমেকা ডালা রে
 কাঁহা পাউঅলে কুরঅখি।
 মহলি ঘারে পাউঅল বহিন করমেকা ডালা রে
 বাড়ি হেঁঠে পাউল কুরঅখি

১১৪)

আমা তরে সূতঅলে রে দাদা, নিমা তরে রে চর
 তাউএ নিহি জাগলউ দাদা, পাপি হিআ রে তর।
 কানেকেরি সনউআরে দাদা, লেইএ গেলা রে চর।
 খেতে আহউ খেতঅ ভরি ধানউআ, কনে কাটে রে ধান
 গাঁউএ আহাত দুসটু খালভরারা, অরাই কাটে রে ধান।
 গাছে আহউ গাছঅ ভরি আমউআ, কনে তড়ে রে আম
 গাঁউএ আহাত দুসটু খালভরারা, অরাই তড়ে রে ধান।

১১৫)

কনঅ পরব মানইএ মানকি মুড়ারা
 কনঅ পরব মানই রে বাগাল।
 দাঁসাই পরব মানইএ মানকি মুড়ারা
 বাঁদনা পরব মানই রে বাগাল।
 কনঅ পরব মানইএ গাঁউএকা বহিনি বেটি
 ডালা লেইএ ফুলা লড়ে জাত।
 করম পরব মানইএ গাঁউএকা বহিনি বেটি
 ডালা লেইএ ফুলা লড়ে জাত।

১১৬)

সসুর কানা ভেসুর কানা, ননদ কানি সঁঞা কানা - সঁঞা কানা
 গেরিআউলা গউ ছটঅ দেউঅরে
 টসকি গিরইএ লর ডুভা মাড়ে।
 গবর গিজা মাটি উভা, তবে তঅ মাড় এক ডুভা - এক ডুভা
 বেসিআম খাঁউ নিতেই গউ দুপহরে
 টসকি গিরইএ লর ডুভা মাড়ে।
 রাইত দিন খাটি খাটি, বছর দিনে একটা ঠেঁঠি - একটা ঠেঁঠি
 ছিঁটি গেলি গউ বনে বাদাড়ে
 টসকি গিরইএ লর ডুভা মাড়ে।

১১৭)

কাঁহাছি ফুটইএ হরদি বল ঝিঙাফুল
কাঁহাছি ফুটইএ লাল সাগুকেক ফুল
বাড়ি হেঁঠে ফুটইএ হরদি বল ঝিঙাফুল
মালাদহে ফুটইএ লাল সাগুকেক ফুল।
কাঁহাছি উপজলঅ ঝালেইর শুআ গউ
কাঁহাছি মইআ উপজলঅ পান গউ।
মালাদহে উপজলঅ ঝালেইর শুআ গউ
ঝারি ঘাটে মইআ উপজলঅ পান গউ।

১১৮)

কেথিকর দিআ বাপু কেথিকরঅ বাতি গউ
কেথিকর তেল বাপু জরেই সারা রাতি গউ।
মাটিকর দিআ বাপু কাপাসেকর বাতি গউ
রাই সরিসাক তেল বাপু জরেই সারা রাতি গউ।
কাঁহাকর দিআ বাপু কাঁহাকরঅ বাতি গউ
কাঁহাকর তেল বাপু জরেই সারা রাতি গউ।
কুমহার ঘারেক দিআ বাপু বাড়ি হেঁঠেক বাতি গউ
তেলিঘারেক তেল বাপু জরেই সারা রাতি গউ।

১১৯)

হিরি হিরি রে মছল খঁচউআ
আউলা রে ননদিক পহনা।
ননদ নিহি লউ অ তর জাইএক মন
লুগা কাচেইতে এতেক খন।
জাউঅইতে রে সিমইর সিটিকা
আউঅইতে ফুলে ভভকাল।
না তড়ি দিহা ভাই ননদসুআ
পহিরতি ননদি হামর

১২০)

বনঅ মাহান পাকঅলঅ খিজুরুআ
তড়ি তড়ি দেলিঅন গিরাই।
নইহরে রহঅলি সমপতিআ
সনউআ ত লেলিঅ গঢ়াই।
সসুর ঘারে পড়লি বিপতিআ
সনউআ ত গেলি রে বেচাই।

১২১)

তুলসি লাগাইএ পরভু গেলা বনিজউআ
তুলসি তঅ দেলা বনাই।
আজা মরঅ আউঅলঅ পহনউআ
বসে আজা মইধঅ আগনাএ।
দেখহঁ দেখহঁ আজা তুলসি কা বনউআ
কইসে কুলঅ রাখঅবঅ জগাই।
মেটহঁ মেটহঁ নাতিন সিধেকা সিঁদুরুআ
তাউএ কুলঅ রাখঅবে জগাই।

১২২)

কনঅ ধনি চরে গেলি রনে কি বনে রে
কনঅ ধনি চরে গেলি কাঁস নদিক পারে।
মইসি ধনি চরে গেলি রনে কি বনে রে
গেইআ কনঅ ধনি চরে গেলি কাঁস নদিক পারে।
মকুনদঅ সহর মইসি ডহরি চললি রে
বিজুবনে মইসি করলঅ চরান।
মালাদহে জে মইসি পনিআ পিঅলে রে
বউরা তরে লেলে রে বাথান।
মকুনদঅ সহর মইসি দাঁকি ফুটি গেল রে
বিজুবনে আইগ লাগি গেল।
মকুনদঅ সহর মইসি সুরখি পিটাউঅল রে
বিজুবনে দুধা ঢারি দেইল।
মালাদহঅ জে মইসি বালি ভাথাই গেল রে
বউরা তর গেলউ রে ঢহি।
মালাদহে জে মইসি মাদিআ কড়অল
বউরা গাছঅ ঘুরিকে লাগাল।

১২৩)

জাউআ উঠাউল মাঞ গউ
করম উঠাউল গউ
মাঝ ডহরোঁ আখঅড়া বাঁধঅল।
একঅ দিন বিতলঅ মাঞ গউ
দুইই দিন বিতলঅ গউ
তিনি দিনে হেলা রে আঁকুর।
নদিকর বালি আনি
জাউআ উঠাউল গউ
জাউআ হেলা হরইদঅ বরন।

১২৪) কুঁদরি লতে বাঁধলে খঁপা
সিদুর কাঁহা পাউলে লউ
ভাইগ ভালঅ তর ছটঅ দেউঅর
সিদুরা পিঁধাউলউ লউ।

১২৫)
কনোঁ মরঅ আনি দেতাক মুঠি মুঠি সাঁখা রে, মুঠি মুঠি সাঁখা
কনোঁ মরঅ আনি দেতাক লেঢ়ি সহিতিনি, রাই বাখিনি রে।
দাদাঞ মরঅ আনি দেতাক মুঠি মুঠি সাঁখা রে, মুঠি মুঠি সাঁখা
সঞাঞ মরঅ আনি দেতাক লেঢ়ি সহিতিনি, রাই বাখিনি রে।
ভাঁগি চুরি জাইঅতঅ মুঠি মুঠি সাঁখা রে, মুঠি মুঠি সাঁখা
জনমভর রহি জাতউ লেঢ়ি সহিতিনি, রাই বাখিনি রে।
কেসন করি ফেঁকঅবে মুঠি মুঠি সাঁখা রে, মুঠি মুঠি সাঁখা
কেসন করি খেদঅবে লেঢ়ি সহিতিনি, রাই বাখিনি রে।
বাঢ়ি সঢ়ি ফেঁকঅবঅ মুঠি মুঠি সাঁখা রে, মুঠি মুঠি সাঁখা
লেখিআইকে খেদঅবঅ লেঢ়ি সহিতিনি, রাই বাখিনি রে।

১২৬)
নিরন মাসে জাইস না দাদা আনেলাই
গবর বানি হেতি উভেলাই।
রপামাসেউ জাইস না দাদা আনেলাই
রপা ডভা হেতি করেলাই।
ভাদর মাসে জাবে দাদা আনেলাই
সঁগিক সঁগে করম নাচেলাই।

লতে লতে করম গিত ৫৬

১২৭)

- * এক মুঠা চেনগি ছউআ পিআজ মেসা বর
(আর) ননদ আউএই লুবকলে দিহা টুকু বর।
- * নদি ধারেক ধাসনাটি ধসি ধসি জাই
আউঅতঅ নদিঞ বান লেগতঅ ধউআই।
- * ই বাড়িক ঝিঁগা লত উ বাড়িকে জাই লউ
দাদাক বহু নিমনটুনি ঝিঁগা নিহি খাই লউ।
- * কুলহি বাটে জাইস না দাদা বাড়ি বাটে জাবে রে
বাড়ি হেঁঠেক জনহাইর গাদর পড়াইকে খাবে রে।
- * ছুটমুটু পাইখটি হরইদ বনে চরেই রে
কন খালভরাঞ মারি দেল কুঁহর কুঁহর করেই রে।
- * কাললা লতে ঝিঁগা লতে বাঝ লাগেই নি
অহঅ কুলহিক ছউআ গিলা নাচে জানত নি।
- * কাললা লতে ঝিঁগা লতে বাঝ লাগেই নি
এগউ ডাঁঢ়াই রহেইতে তরাক লাজ লাগন নি।
- * ছুটমুটু ডুঁগরি, তাহঁ ধরত কুঁদরি
দে নঅ দাদা ঠেঁগা কাটি বহু জাতি বাগালি।

লতে লতে করম গিত ৫৭

- * ছুটুমুটু ডুংগরি, তাই ধরত কুঁদরি
দে নঅ দাদা ঠেঁগা কাটি বহু জাতি বাগালি।
- * আঁসপাত বাঁসপাত ছনকাই রাঁধঅব লউ
বড় ভউজি মাগে আউলে মু মচকাই দেবঁ লউ।
- * আঁসপাত বাঁসপাত ছনকাই রাঁধঅব লউ
ছুটু ভউজি মাগে আউলে ডুতি ভততি দেবঁ লউ।
- * সুপ নাচেই সুপতি নাচেই, নাচেই সুপেক কনা গউ
আখড়াএ পরবতি নাচেই হিলেই কানেক সনা গউ।

১২৮)

দেসঅ বুলি আউলে পরভু
নগর বুলি আউলে হউ
লেখ পরভু - একঅ ঝারি পানি।

রাখু ধনি ঝারি ঝর তর
রাখেঁ ধনি পিঁচা গে।
কাহে ধনি মুঁহঅ রে মলিন।

মাএ তরঅ রাঁধঅনি - বহিন তরঅ বাঁটঅনি
নিতি পরভু পেটে কি সাসন।
মাএকে পাঠাউবেএ ধনি - অনিজে বনিজে গে
বহিনি পাঠাউবেএ পরদেস।
বিহইলা পাউবে পরভু - সাঁঘইলা জে পাউবে হউ
নিহি পাউবে মাএঅ রে বহিন।

১২৯)

গেলা পহরঅ রাতি - আইলা ভিনসরা গউ
ভিনসারে গড়ে মাগেই তেল।
সাসঅ ঘুমালা ভালা - ননদি ঘুমালা গউ
কাঁহা পাইএ গড়ে দেবঁ তেল।।
সাসঅ ডরাউলে ধনি - ননদি ডরাউলে গউ
মকে না ডরাউলে বনবাস।
সেহঅ সুনি দাদা মরঅ - আউএ ঘড়াক পিঠে গউ
কিআ লাই বহিনিক বনবাস।
কনঅ নেহি দসঅ দাদা - কনঅ নিহি গুনা গউ
একে কথাই লেলঁ বনবাস।।

১৩০)

কাকর মুড়ে সভইএ লটঅপটঅ পগিআ
অরে কাকরঅ মুড়ে, কাকর মুড়ে ঢামনাকা সাঁপ।
ভইআক মুড়ে সভইএ লটঅপটঅ পগিআ
অরে সঁএগাক রে মুড়ে, সঁএগাক মুড়ে ঢামনাকা সাঁপ।
কইসন করইএ লটঅপটঅ পগিআ
অরে কইসন রে করে, কইসন করে ঢামনাকা সাঁপ।
ঝিকিমিকি করইএ লটপটঅ পগিআ
অরে লাটার রে পাটার, লাটার পাটার ঢামনাকা সাঁপ।

১৩১)

কনে তকে করম রাজা আনলঅ নেউঅতি রে
আনলঅ নেউঅতি
কনে তকে করম রাজা রাখলঅ উপাসি।
মাঝি মাহাতএ করম রাজা আনলঅ নেউঅতি রে
আনলঅ নেউঅতি
গাঁউএকর বেটিছউআএ রাখলঅ উপাসি।